

弘

簡

錄

弘簡錄卷七十五

明刑部員外郎仁和邵經邦弘齋學

皇清翰林院侍講學士四世孫遠平校閱

載記 五代梁一

太祖朱全忠

郢王朱友珪

末帝朱友貞

太祖皇帝姓朱氏名溫宋州碭山縣午溝里人父諷以五經教授早喪遇黃巢亂溫亡入賊中從攻嶺南至入京僞受東南面行營先鋒陷同州改僞防禦使屢爲王重榮所敗請巢益兵中尉孟楷輒抑絕不通客有謝瞻者說溫曰黃家起於草莽幸唐衰亂投隙攘取非有功德豈足與於興王之事哉今唐德未厭將軍雖萬死力戰而爲庸人所劾此章邯所以背秦而歸楚也溫以爲然乃殺其監軍嚴實自歸河中因重榮以降都統王鐸

承制奏拜左金吾大將軍河中行營招討副使僖宗賜名全忠

中和三年授汴州刺史宣武軍節度使會諸鎮兵破黃巢復京師巢復陷蔡州陳刺史趙犇乞兵全忠自將救之敗巢將黃鄴尚讓等犇心德之始附屬焉又追敗巢于郾城及中牟并下滿城封止非檢校司徒同平章事封沛郡侯光啓二年進爵爲王義成軍亂逐節度使安師儒來奔殺之以胡真爲留後十二月徙封吳興郡王泰宗權稱帝遣將秦賢盧瑋張晙攻汴環列三十六柵王兵少不敢出數爲所困求援兗鄆次年春擊賢板橋拔其四柵又擊瑋于葛勝敗死宗權自將精兵柵于北郊五月朱瑾與宣來赴王置酒高會酒半陽起如廁以輕兵由北門出晙不意襲之兗鄆兵從而合擊遂大勝斬首二萬宗權與晙夜走復遣晙來攻王登封禪寺後岡望其兵過遣朱珍躡之而自

率精騎出其東伏大冢間伺旌食畢來擊珍兵少却王引伏兵橫出斷旌軍爲三擊之大敗旌脫走宗權怒斬之而河陽陝洛之兵爲宗權守者因各潰去悉爲李罕之張全義所取咸來歸附十月賜王紀功碑王復欲取兗郛無由移檄誣璉與亶誘汴亡卒而東發兵攻之下曹漢二州進攻郛大敗而還十二月賜王鉞券及德政碑高駢死奉命兼淮南節度使行抵宋州聞楊行密已入揚不納而還宗權復陷襄州節度使趙德諱歸朝拜王蔡州四而行營都統卽用德諱爲副昭宗卽位政已不在天子天雄軍節度使樂彥真爲所囚其子從訓乞兵遣朱珍助之張全義復逐李罕之取河陽爲李克用所圍亦來求救又遣丁會牛存節擊敗晉兵于沈河上書諭徐州時溥前討蔡州不克欲激怒之以起兵端會楚州刺史劉瓚以駢死來奔遣珍將兵

聲言送瓚，沛怒出兵來拒，與戰于吳康，大敗之。遂取豐、蕭二縣，攻下宿州。遣龐師古攻徐捷于呂梁，龍紀元年轉侍宗權獻于京師。自是併有淮西，道連襄鄧，兵勢愈盛。三月，敗封東平郡王。七月，如蕭縣，是冬大雨，攻徐不能軍而還。大順元年春，遣龐師古攻孫儒于淮南。四月，自將攻張筠于宿州，與晉王克用交訟，訴其謀害事。朝廷知曲在汴，遣使和解。王奏克用終爲國患，請因其敗與河北三鎮共討除之。宰相張濬私與汴交力，違諸大臣議，拜王東南面招討使，令朱全彥選汾卒三千爲藩牙隊，身自不行，遣朱崇節、葛從周入潞州。李讜、李重胤、鄧季筠攻澤州，晉將李存節來拒，生擒季筠、崇節等四人，俱遁。朝廷改義成爲宣義，以王兼領節度使而罷淮南鎮。十月，遂如滑州，假道于魏以攻河東，且責其軍須，亦以怒魏爲兵端。羅弘信辭糧乏，且非

所當出皆不許於是攻魏二年正月王及魏人戰于內黃大敗之屠故元城弘信來送款十月克宿州十一月曹州將郭紹賓殺其刺史郭饒來降十二月丁會敗朱瑾于金鄉景福元年二月復攻鄆前軍朱友裕敗于斗門王兵後至又敗冬友裕取濮州復攻徐二年四月師古克徐州時溥自殺復攻兗鄆乾寧元年二月王自徐及朱宣戰于漁山大敗之二年八月又敗之于梁山十一月又敗之于鉅野宣求救河東克用發兵來援假道于魏怒魏人反擊大舉攻魏弘信復來求救遣葛從周赴之三年五月戰于洹水擒克用子落落送魏殺之七月李茂貞犯京師天子出居華州王請以兵赴難優詔止之請遷都未許四年正月師古克鄆州王如鄆表子友裕爲留後朱瑾棄兗奔吳表葛從周爲留後九月攻吳命師古出清口從周出安豐王軍宿

州楊行密遣璠先擊師古敗死從周亟返兵至潁河瑾又敗之王懼馳歸光化元年王兼領天平軍四月遣從周攻晉取邢洺磁三州七月德諱子匡凝與行密克用交通事泄遣氏叔琮康懷英攻之取泌隨鄆三州匡凝請和乃止十二月罕之以潞州來降二年劉仁恭攻羅紹威王救魏敗仁恭于內黃四月遣叔琮攻晉不克七月晉復取澤潞十一月保義軍亂殺節度使王珙推牙將李璠為留後別將朱簡復殺璠來降表為節度使三年四月遣從周攻仁恭戰于老鵝堤大敗之取德州八月晉復洺州王如洺又取之時鎮定皆附于晉遂攻鎮州破臨城王鎔送款復攻定州王郜奔晉其將王處直以州降天復元年進封梁王時三鎮已服欲窺王室以河東與河中連衡遣張存敬將兵三萬由含山趨晉絳出其不意先斷援兵之路後圍河中王

珂乃降三月大舉攻晉命叔琮出太行從周存敬弁侯言張歸厚及鎮定之兵皆會太原圍之不克五月王兼河中尹護國軍節度使帝與崔胤謀誅宦者韓全誨等謀泄胤恐反噬矯制急召梁兵十月王以宣武宣義天平護國兵七萬至河中全誨等劫天子奔于鳳翔王聞車駕已出議引軍還張濬勸曰韓建茂貞之黨不取必爲後患乃進軍逼其城建軍騎迎降送於陳州復攻邠州降李繼徽質其妻子屯于三原節度使楊崇本以邠寧慶衍四州降二年春退軍河中李嗣昭攻晉絳以救鳳翔遣友寧敗之于蒲縣茂貞大失所倚王乃復取汾慈隰三州已而師還三州復入于晉四月友寧引兵西至興平及茂貞戰于武功大敗之王總大軍圍鳳翔爲五寨環之十一月郾坊李周彝救鳳翔王遣孔勍襲郾州鹵莽族降之時茂貞堅壁不出王用

親從指揮高季昌策誘岐兵開門攻汴營王率百營俱出分據城門殺傷殆盡鳳翔自是喪氣議與連和不復以詔書勒還鎮矣三年正月茂貞殺全誨等戮首以示約出天子解甲還至興平王親爲執轡涕泣行十餘里見者咸以爲忠至京師嘗侍殿上天子意衛兵有能擒之者乃陽爲轡解顧王跪而結之左右無敢動者因流汗洽背自此稀復進見二月王引兵東歸遣友寧攻青州王師範敗死先是師範舉兵入兗張濟實預其謀王恐範復扇動諸藩諷張全義使殺之九月楊師厚大敗青人于臨朐師範劉尋皆降王以邠州鳳翔兵屢近京畿疑其復有劫遷之謀天祐元年正月如河中請帝遷都洛陽帝行至陝州王朝于行在辭以宮室未完先赴洛陽督工四月奏宮室畢功請車駕早發甲辰帝至東都先是楊崇本降質其家崇本妻美因

與爲亂崇本怒與諸鎮同謀舉兵六月以討崇本爲名舉兵如河中陰遣朱友恭等弑昭宗王欲代唐使人諭諸鎮趙匡凝不可遣楊師厚攻之取唐鄧復郢隨均房七州九月破襄州匡凝奔淮南復取荆南匡明奔蜀十一月辛巳加封魏王任相國總百揆三代祖考皆爲魏王以宣武宣義天平護國天雄武順佑國河陽義武昭義武寧保義忠義武昭武定泰寧平盧匡國鎮匡荆南忠武二十一軍爲魏國備九錫不受十二月復以爲天下兵馬元帥益怒遣人誣告蔣玄暉與何太后私通殺而焚之併弑太后于積善宮又殺宰相柳璨太常卿張延範車裂以徇三年助羅紹威誅牙兵盡獲魏博六州紹威深贊篡代之謀將罄六州軍賦以助大禮王欲威河朔冀劉仁恭父子乞盟與之相結以固王鎔紹威之心自汴州北度河攻滄州仁恭求救

于晉晉人取潞州王乃旋軍

開平元年正月至大梁二月唐詔文武百官盡赴元帥府勸進
三月所遣張文蔚至自上游驛米開寶乘輅車導以金吾仗衛
太常鹵簿朝梁王於金祥殿四月壬戌王更名晃甲子袞冕南
面文蔚蘇循捧冊升殿進讀已楊涉張策捧傳國璽薛貽矩趙
光逢捧金寶以次升降率文武百官北面舞蹈王仰皇帝位戊
辰大赦改元國號梁升汴州爲開封府建爲東都改唐東都爲
西都廢京兆府爲雍州賜酺一日五月丁丑朔以文蔚涉爲門
下侍郎貽矩中書侍郎並同平章事乙酉封諸子友諒等咸爲
王甲午改樞密院爲崇政院以敬翔爲使六月甲寅韓建守司
徒平章事七月己亥追尊四代祖考爲皇帝妣爲皇后高祖黯
諡宣元廟號肅祖妣范氏諡宣僖會祖茂琳諡光獻廟號敬祖

姚楊氏諡光孝祖信諡昭武廟號憲祖姚劉氏諡昭懿考諡文
惠八月丁卯同州野蚘蟲生九月括馬十月己未講武繁盛十
一月壬寅赦亡命背軍髡鬻刑徒二年正月己亥卜郊于西
都弒濟陰王二月辛未契丹阿保機遣使者來三月戊寅封鴻
臚卿李崧介國公爲二王後癸巳改卜郊四月癸卯楊涉罷以
吏部于兢爲中書侍郎禮部張策爲刑部侍郎並同平章事五
月戊戌立唐三廟十一月癸巳張策罷楊涉復相十二月己亥
以介國公備三恪鄴國公萊國公爲二王後三年正月甲戌
如西都然燈以祈福庚寅享太廟辛卯南郊大赦丙寅羣臣上
尊號曰睿文聖武廣孝皇帝二月壬戌講武于西杏園甲子帝
如河中三月辛未渤海國王大諲譔遣使者來五月己卯還京
六月辛亥如陝州乙卯朱友謙爲同州東面行營招討使并州

軍亂逐刺史宋如海七月商州軍亂逐刺史李弼亦奔于岐乙丑克丹州執首惡王行思乙亥還京甲申襄州軍亂殺留後王班房州刺史楊虔叛附于蜀八月辛亥降死罪囚辛酉均州刺史張敬方克房州執楊虔誅之閏月己卯闕稼于西苑九月壬寅行營招討使左衛上將軍陳暉克襄州執其首惡李洪伏誅丁未王檀爲潞州東面行營招討使辛亥韓建楊涉罷以趙光逢爲中書侍郎杜曉戶部侍郎並同中書門下平章事十一月甲午日南至告謝于南郊己酉搜訪賢良遣康懷英伐岐十二月懷英克寧慶衍三州及劉知俊戰于昇平敗績四年正月壬辰朔始用樂丁未講武于榆林二月己丑闕稼于穀水八月岐人晉人攻夏州丙寅帝如陝州以河南尹張宗奭留守西都辛未楊師厚復爲西路行營招討使以伐岐九月己丑還京辛

亥搜訪賢良十一月己丑王景仁爲北而行營招討使以伐趙
趙王鎔北平王處直叛附于晉晉人救趙十二月癸酉初頒律
令格式

乾化元年正月庚寅朔日食王景仁及晉人戰于栢鄉敗績辛
卯赦流罪以下囚求危言正諫癸巳轉楊師厚北面行營招討
使五月甲申朔大赦改元癸巳幸張宗奭第八月戊辰闢稼于
榆林戊寅大閱于興安鞠塲九月辛巳朔御文明殿行入闕儀
庚子晉人攻魏帝如魏州十月丙子大閱于魏東郊十一月高
萬興取鹽州壬辰還京乙未回鶻吐蕃遣使者來二年二月
丁巳光祿卿盧耽使于蜀甲子晉人及鎮定攻相魏復如魏州
次白馬殺左散騎常侍孫隲右諫議大夫張衍兵部郎中張偁
戊寅如貝州三月丙戌屠棗壘四月己巳還京戊寅如西都五

川丁亥下德音降死罪已下囚罷役徙禁屠及捕生六月友珪
弑帝年六十一

友珪母本逆旅婦人太祖鎮宣武略地宋毫間野合而生長而
辨黠多智爲郢州留後忠武軍節度使徙鎮武寧封郢王時嫡
嗣尚未立惟友文年長帝自張后崩不納繼室留諸子在鎮者
之婦入侍友文妻王氏有色尤寵之與友珪妻張氏嘗專房及
有疾以傳國寶與王氏令往東都召友文欲屬以後事命敬翔
與友珪一郡趣使之任以爲萊州刺史帝素剛暴喜怒罔測凡
左降必有後命友珪大懼張氏又言禍在旦夕夫婦相對而泣
左右勸以事急計生何不早圖卽日易服微行入左龍虎軍見
統軍韓勅與謀大事勅以牙兵五百隨友珪雜控鶴衛士而入
丙夜斬關進萬春門至寢中侍疾者皆走帝惶駭而起呼曰我

久疑此賊恨不早殺之。逆賊忍殘父乎。友珪令親吏馮延謬以劒犯帝。旋柱而走。凡三匝始憊。倚仆于牀。廷諤洞其腹。腸胃皆流。友珪舉以桐槨。秘喪四日。出府庫大賚將士。羣臣矯詔遣受旨丁昭補馳至東都殺友文。歸以弑逆大過。然後發喪。友珪權主軍國。以六月既望。自卽帝位。拜韓勛忠武軍節度使。以朱友謙爲中書令。不受命。次年正月。祀南郊。改元鳳曆。二月。末帝兵至。友珪偕張氏趨北垣樓下。將踰城以走。不果。使廷諤先刃其妻。及已後。仍自殺。廢爲庶人。凡七閏月而敗。

末帝名友貞。行三。爲人美容貌。沈厚寡言。雅好儒生。初封均王。爲左天興軍使。東京馬步軍都指揮使。友珪篡位。以尹開封爲東京留後。鳳曆元年二月。駙馬趙巖至東京。王與言弑立之事。令往魏州見楊師厚。計議師厚遣將王彝賢至洛陽告太祖外。

孫左龍虎統軍袁象先使討賊是時龍驤軍將劉重霸戍懷州作亂友珪遣霍彥威擊收于鄆陵其餘兵奔散方亟捕之王乃僞爲友珪詔書發左右龍驤在東都者皆還洛陽因激怒之曰天子以懷州屯兵叛汝等欲盡坑之諸將皆泣莫知所爲王諭曰先皇帝經營王業三十餘年今日尚爲友珪所殺汝等安所逃死乎因出畫像示諸將而泣曰汝能趨洛陽擒逆賊則轉禍爲福矣軍士皆呼萬歲請王爲主王乃遣人趣象先等庚寅以禁兵討賊象先遣嚴持傳國寶至東都請王入洛陽王報曰夸門太祖所以興王業也北拒并汾東至淮海國家藩鎮多在東方命將出師利於便近遂卽位于東都仍稱乾化三年復博王友文官爵三月丁未更名鉉五月楊師厚取滄州九月甲辰御史大夫姚洎爲中書侍郎同平章事十二月晉人取幽州

四年二月岐人數寇徙康懷英爲永平節度使鎮長安四月丁丑貶于兢萊州司馬

貞明元年三月丁卯趙光逢罷四月分相瀘衛三州爲昭德軍命宣徽使張筠爲節度使己丑天雄軍亂節度使賀德倫叛附于晉五月邠州李保衡耀州溫昭圖皆叛于岐來附六月庚寅朔晉王李存勗入魏取德州十月辛亥康王友孜反伏誅十一月乙丑改元是歲帝更名瑱二年正月名前河南參軍李愚爲左拾遺充崇政院學士三月劉鄩及晉人戰于故元城敗績奔滑州晉人取衛惠州捉生都將李霸反伏誅六月捉生都將張溫叛降于晉七月晉人取相州張筠來奔安國軍節度使閻寶叛附于晉八月丁酉致仕趙光逢復爲司空兼門下侍郎同平章事九月晉人取滄州橫海節度戴思遠奔于京師晉人克

貝州守將張源德死之十月丁酉中書侍郎鄭珏同平章事

三年四月辛卯右千牛衛大將軍劉璩使契丹十二月宣義節

度賀瓌爲北而行營招討使己巳如西都卜郊晉人取楊劉

四年正月不克郊四月己酉吏部侍郎蕭瑄爲中書侍郎同平

章事己巳光祿罷十二月庚子朔賀瓌殺其將謝彥章孟審澄

侯溫裕癸亥瓌及晉人戰于胡柳敗績秦寧軍節度使張守進

叛附于晉以亳州團練使劉鄩爲兖州安撫制置使以討之

五年正月晉軍于德勝八月乙未朔開封尹王瓚爲北面行營

招討使十月劉鄩克兖州守進伏誅十二月晉人取濮陽天平

節度霍彥威爲北面行營招討使六年四月己亥降德音錄

死罪以下囚乙巳左丞李琪爲中書侍郎同平章事河中朱友

謙襲同州殺節度使程全暉叛附于晉遣秦寧軍節度使劉鄩

討之九月庚寅供奉官鄭公遠爲契丹歡好使

龍德元年正月趙將張文禮弑其君鎔三月丁亥朔禁私度僧尼五月丙戌朔改元降流罪已下囚七月以天平軍節度使戴思遠爲北而行營招討使十月思遠及晉人戰于威城收績

二年正月思遠襲魏州取威安八月滑州兵馬留後段凝攻衛州執其刺史李存儒思遠克淇門共城新鄉三年閏四月唐人取鄆州五月庚申以宣義軍節度使王彥章爲北面行營招討使取德勝南城八月罷彥章以段凝代之先鋒將康延孝叛降于唐十月甲戌彥章及唐人戰于中都敗績死之唐人取曹州盜竊傳國寶奔于唐戊寅莊宗入汴帝登建國樓謂控鶴指揮使皇甫麟曰晉吾世讐不可俟彼刀鋸卿可盡我命相持慟哭麟旣刃帝亦自斃莊宗命河南張全義葬其屍年三十六梁

亡

載記 五代梁二

太祖母王氏

兄全昱存

太祖后張氏

弟儀陳氏昭容李氏

末帝妃張氏

郭氏

子友裕

友文友友等

太祖母王氏單父人早寡生三子長全昱次存次太祖素苦家貧不能自活搗以餬食蕭縣太祖自幼凶悍壯而無賴縣中皆厭苦之性復頑情主劉崇家不作業數加笞責崇有母獨奇其狀貌憐之時時為櫛沐戒家人曰朱三非常人可善遇之及貴遣人以車馬迎母於崇家使者至母惶恐走避曰朱三落魄無行作賊死矣何乃至此使者具道所以母驚喜泣下與崇母俱載以歸初封晉國太夫人時方鎮宣武置酒舉觴為壽歡甚啓母曰朱五經平生讀書不登一第有子為節度使無忝於先人

矣母則然良久曰汝能至此可謂英特然行義未必得如先人
驚問其故母曰朱二與汝俱山從軍獨死蠻嶺其孤皆在午溝
汝今富貴獨不念之乎太祖涕泣謝罪乃悉召存諸子以歸母
嘗戒其剛暴每遇殺人多全活之大順二年秋以疾卒於午溝
全昱爲人無他材能性頗長厚二弟逃亡獨與其母居崇家
備食如故迎歸宣武久之領嶺南西道節度使以太師致仕時
將受禪有司備禮前殿全昱視之顧太祖曰朱三爾作得否又
嘗內宴酒酣與諸王博取骰子擊盆呼曰朱三爾碭山一百姓
遭逢唐天子用汝爲四鎮節度使於汝何負而滅唐三百年社
稷吾將見汝赤其族矣太祖不悅罷會及封廣王不樂居京師
復居碭山故里長子友諒初封衡王乾化元年升宋州爲宣武
軍以爲節度使進瑞麥一莖三穗太祖怒曰今年大水何用此

爲乃罷居京師太祖嘗臥病全昱來視相持慟哭因釋友諒使與東歸貞明二年全昱疾薨以友諒嗣封廣王次友能爲宋滑二州留後陳州刺史封惠王所至不法姦人多依倚之陳俗好淫祠左道妖人母乙董乙聚衆自稱天子建置官屬攻坊州縣宋帝發兵擊滅之明年四月友能反以兵犯京師至陳留敗還後數月遇赦降爲房陵侯次友誨封邵王爲陝州節度使亦欲以州兵爲亂召還京師兄弟皆被幽囚梁亡同日見殺存有勇力追封明王二子友寧字安仁幼聰敏喜愠不形於色初爲軍校善用弓劍遷衙內制勝都指揮使龔州刺史梁圍鳳翔遣東備宣武王師範圍齊州引兵擊之奪馬千匹斬級數千昭宗還京拜建武軍節度使賜號迎鑾毅勇功臣太祖復遣攻師範圍博昌屠其民清河爲之不流後戰於石樓兵敗墮馬見殺追

封安王 友倫幼亦明敏通論語小學曉音律爲元從馬軍指揮使表右威武將軍燕人攻內黃以前鋒夜渡河奪馬千匹李罕之降晉人來攻命以兵入潞取罕之以歸累遷檢校司空領藤州刺史方圓鳳翔晉復來襲命以兵三萬出隰山却晉師西與太祖會於鳳翔昭宗復拜寧遠軍節度使留宿衛伺察昭宗所爲俄以擊鞠墜馬死太祖大怒將兵七萬至河中遣友諒入京殺亂及皇城使王建勳閤門使王建襲客省使王建乂凡與擊鞠者皆死後乃追封密王

太祖妻張氏碭山縣渠亭里富家子少以聘歸生末帝初封魏國夫人素性賢明精悍動有禮法太祖嘗畏之每以外事詢訪言多切中值太祖暴怒賴救護多獲保全或時出兵行至中途夫人意不謂然馳介名之如期而至太祖怒友裕不追朱瑾友

裕懼死與數騎亡入山中久乃自匿於廣王宮陰使人教其脫身自歸因晨馳入見拜伏庭中泣涕請死太祖甚怒使左右捽出斬之夫人尚不及履亟走出持之泣曰汝束身歸罪豈不欲明非反乎因爲力解乃免又將納璵妻夫人悽然泣下曰本以同姓之國昆仲之間因小故興兵至此若不幸汴州失守妾亦如此矣言已又泣祖爲感動得送爲尼給其衣食天復元年病卒追卹賢妃葬開封府潤色鄉自後肆無所忌恣爲荒淫末帝立追諡元貞皇太后改祔宣陵

昭儀陳氏與昭容李氏皆以色進陳氏宋州人時嬪妾數百陳獨專寵嘗因太祖有疾與尼數十人晝夜爲佛法未嘗少懈以爲愛已益寵之開平三年度爲尼居宋州佛寺李氏尤謹愿未嘗去左右太祖病方晝寢屋棟偶折亟牽太祖衣遂驚走以是

德之拜昭容皆不知所終

末帝德妃張氏歸霸之女以婦聘之卽位將間爲后妃請待郊
天而帝終不得郊貞明五年病薨年二十四 郭氏父歸厚梁
登州刺史少以色進汴州失守故妃皆泣迎莊宗初召賀王友
雍妻石氏有色不從慢罵殺之次召妃懼而聽命已乃度爲尼
賜名誓正居洛陽卒時末帝首猶藏太社晉天福三年詔許親
屬收葬遣右衛將軍安崇阮與妃同葬之

太祖七子連養子共八長友裕字端夫幼善騎射相隨征伐能
以寬厚得士卒心太祖與晉王圍黃邾於西華遣卒荷稍登城
漫罵晉使蕃騎連射不能中太祖顧友裕一發中之軍中皆大
呼晉王喜遣以良弓矢初爲宣武衙內都指揮使景福元年攻
鄆命爲先鋒次斗門鄆兵夜擊之友裕敗走前軍遇敵者皆死

時朱宣在濮州命以二百騎前驅太祖後至遽相失猝與敵遇
追之前至大溝幾不免賴有積薪馬得過將李璠等死者十餘
人冬取濮州遂圍徐州時溥朱瑄引兵救溥敗于石佛山遁走
都虞候朱友恭讒以棄瑄不追太祖大怒賴皇后救兒命權知
許州時近蔡苦于大寇居民殘破爲招撫流散增戶三萬餘遷
諸軍都指揮使引兵定蔡州市不易肆祖兼鎮護國軍以爲留
後遷忠武軍節度使方攻鳳翔未下友裕先破靈臺良原下隴
州邠州楊崇本降後復叛遣友裕攻之屯于永壽以疾卒追封
邠王友文字德明本姓康名勤幼美風姿多材藝好學善談論
頗能爲詩太祖愛之以爲四鎮度支鹽鐵制置使用兵四方征
賦聚斂以供軍費卽位封博王留守東京次福王友璋賀王
友雍建王友徽康王友孜友璋初爲壽州團練使押左右番殿

直監豐德庫後不知所終友孜生而目重腫子常竊自負當爲天子貞明元年使刺客夜入宮末帝方寐夢人告已旣寤聞榻上寶劒鎗然有聲躍起抽劒索得刺客手殺之明日誅友孜由此疎弱宗室而信任趙巖張漢傑以至於亡

而曰古稱構杙凶暴之尤父篡子弑兄賊弟讐生靈塗炭社稷墟丘遺臭萬年汗簡包羞

弘簡錄卷七十五 終

弘簡錄

卷七十五

五代紀事

弘簡錄卷七十六

明刑部員外郎仁和邵經邦弘齋學

皇清翰林院侍講學士四世孫遠平校閱

載記 五代 梁三

敬翔

李振

氏叔琮朱友恭

蔣玄暉

孔簡王殷

張文蔚

父楊子鑄

張策

薛貽矩

蘇循

子楷

裴廸

韋震

朱珍

李唐賓

龐師古

葛從周

霍存

張存敬

子仁

符道昭

劉捍

寇彥卿

康懷英

劉郭

子遂

牛存節

張歸霸

弟歸厚歸弁子漢傑

王重師

徐懷玉

楊師厚

王景仁

賀瓌

謝彥章

王愐

馬嗣勲

王虔裕

敬翔字子振同州馮翊人唐相暉後少好學工書檄不第之梁
爲人作箋刺薄之軍中太祖素不知書愛其所作皆俗語令引

見問以子讀春秋所記何事翔曰皆諸侯爭戰之事其用兵之法今可爲吾用乎對曰兵者應變出奇以取勝春秋古法不可用於今祖大喜因不樂軍職以爲館驛巡官值與蔡人戰汴郊祖悅其謀盡多中自謂得翔之晚凡動靜輒以詢之及奉車駕自岐還京昭宗召與李振升延喜樓勞問拜翔太府卿後遷洛陽宴崇勳殿酒半使人召太祖入殿內將有所託祖懼辭疾上謂卿有疾可使翔來亦佯醉去祖旣破趙匡凝取荆襄欲攻淮南翔切諫謂新勝之兵宜持重以養威不聽兵出光州遭大雨幾不得進攻壽州又不克反多亡失始大悔恨歸而忿躁益以翔可信任其爲篡弑多用翔謀卽位以唐樞密院故用宦者改爲崇政院卽命爲使遷兵部尚書金鑾殿大學士素性深沈有大畧自從用兵三十餘年關陟細大之務盡心勤勞晝夜無寐

惟於馬上假息片時。祖剛暴難近。有所不可。未敢顯言。大略微
開端。倪伺其意。悟多所改易。其妻劉氏故尚讓婦。更歸時。溥祖
破徐州。得而愛。幸因以妻翔。雖貴。猶出入臥內。如曩時。劉性驕
侈。車服僭擬後宮。別置典謁。交結藩鎮。權貴多附之。寵信不下
於翔。後友珪自立。忌翔先帝謀臣。慮恐圖已。代以李振轉翔中
書侍郎。同平章事。多稱疾。未嘗蒞事。末帝卽位。趙巖等離間。愈
不得志。再後。梁失河北。段凝將精兵。悉在河上。翔進諫。故時河
朔半在。以先帝之武。御貔虎之臣。猶不得志於晉。今晉日益弱。
梁日益削。陛下處深宮之中。所與計者。非其近習。則皆親戚之
私。如此而望成事乎。臣聞晉攻楊劉。李亞子負薪渡水。爲士卒
先。陛下委蛇守文。以儒雅自喜。而遣賁瑒爲將。豈足當彼之餘
鋒乎。臣雖憊受國恩深。願得自效。巖等以爲怨望。不用。王彥章

敗末帝懼名凝不至遽呼翔曰朕居常忽卿言今急矣勿以爲
懟卿其教我當安歸翔曰老奴從先帝至今敢有所隱陛下初
用段凝臣已爭之今凝不來敵勢已迫請先死不忍見宗廟之
亡也遂相向慟哭自經而死

李振字興緒祖抱真唐功臣振仕唐爲金吾將軍拜台州刺史
盜起不果行西歸過梁以策干太祖因留之表爲鄆州節度副
使令奏事長安舍梁邸宦官劉季述謀廢立遣其姪希正因邸
吏程巖見振願得協力以定中外如何振初以爲駭謂梁興百
萬之師方仗大義尊天子君等無爲此不祥也及還季述詐爲
太上皇詰告太祖太祖猶豫未知所爲振勸曰夫豎刁伊戾之
亂所以爲霸者資也今閹官作亂天子危辱此王仗義立功之
時祖大悟乃囚使者遣振詣京師見崔胤謀反正昭宗旣出祖

大喜執手曰卿謀得之遣往代青州王師範疑懼未敢信說以君獨不聞漢張繡乎繡與曹公爲敵然不歸袁紹而歸曹公者知其志大不以私讐殺人也今梁王方欲成大事豈以故怨而害忠臣師範洗然自釋乃西歸梁昭宗遷洛振往來京師朝臣少有怒者必加譴謫時人目爲梟鳥與氏叔琮朱友恭謀弒昭宗太祖又問所以待友恭等宜如何振曰昔晉文帝弒高貴鄉公而誅成濟不然何以塞天下口於是歸罪友恭等而殺之始振舉進士不中憤唐公卿及是賜裴樞等七人死白馬驛悲曰此輩嘗自言清流可投之河使爲濁流太祖笑而從之累遷戶部尚書崇政院使莊宗入有詔洗滌赦梁羣臣大喜邀敬翔同入朝翔曰何面目入梁建國門已而伏誅叔琮開封尉氏人性沈壯有膽力中和末以騎士隸威化軍爲梁騎兵伍長數

戰黃黑有功使將後院馬軍從攻徐兗表爲宿州刺史未幾敗于襄陽蒲陽翟鎮遏使復起歷曹晉二州刺史晉王與梁求成因書詞親遣與賀德倫等自太行入攻取澤潞出石會關營于洞渦糧盡乃旋晉人復取絳州攻臨汾叔琮選壯士雜晉兵行道中擒二兵以歸晉人疑爲有伏驚退屯于蒲縣會遣朱友寧將萬人來援叔琮懼其無功乘夜擊破其壘俘斬至太原已而兵大疫復整隊殿而還徙保大軍節度使檢校司空友恭本姓李名彥威壽州人少客汴州殖財任俠爲人頴悟善揣人意太祖愛之養以爲子冒姓名領長劔都積功至檢校尚書左僕射歷汝潁二州刺史楊行密侵鄂州使將兵萬餘往救杜洪至江州還攻破黃州獲守將俘斬萬計又襲安州進司空威化軍節度留後梁迫天子遷都晉與蜀傳檄天下舉兵誅梁太祖大

懼恐昭宗奔他鎮。又悞帝無傳禪之意。惟殺之人。望始絕陰遣
敬翔至洛。拜彥威叔琮左右龍武統軍使。行弒逆八月壬辰。計
至河中。太祖陽爲驚駭。投地號哭。罵曰。奴輩負我。俾我被惡名。
於後世。乃流二人嶺南。使張延範殺之以滅口。

蔣玄暉少賤。不得其系事。太祖爲腹心。東遷時。爲樞密使。帝自
出關度梁。必行篡逆。常默坐流涕。日憂不測。與皇后終日沉飲。
或相對涕泣。是夜玄暉選勇士百人叩宮門。言有急奏。請見帝。
夫人裴貞一啓闕。問何得以兵輒入。龍武牙官史太遽前殺之。
玄暉趨椒蘭殿。問上安在。昭儀李漸榮曰。院使毋傷官家。寧殺
我。太持劍入。帝方醉臥。聞變遽起。單衣環柱走。漸榮以身蔽俱
死。復執后求哀。釋之。明日玄暉矯爲遺詔。出二人首。言帝夜博
爲貞一漸榮所弒。太祖自河中來朝。臨于西內。對哀帝自言非

本謀因泣下請討十一月至大梁密使玄暉急圖禪代柳璨等
議以晉魏以來皆先封大國加九錫殊禮然後受禪而宣徽副
使孔循王殷斌玄暉權寵急欲得樞密使謂巧述閑事以阻大
計譖玄暉欲延唐祚故逗留以須變太祖大怒削其官爵爲凶
悖庶人斬首焚之至莊宗時唐故內人景範言當行弒時諸王
宗屬數百人皆遇害同爲一阬瘞于龍興寺北至是合爲一冢
以故謾王爲首葬以一品禮云 循少孤流落汴州富人李讓
收以爲子讓又爲梁祖養于是爲朱友諒循冒姓朱氏稍長給
事帳中拜諸兒乳母爲子復冒姓趙名殷衡唐亡事梁爲汝州
防禦使左衛大將軍租庸使始改姓孔名循莊宗時命權知汴
州心持兩端遣迎明宗於北門迎莊宗於西門戒其人曰視先
至者入明宗先至遂納之卽位任樞密使明宗幸汴州使留守

東都族私造麴者之家上知其寃刈除天下麴禁許民得自造
爲人柔佞憐狎安重誨親信之凡所言無不聽明宗欲娶重誨
女爲婦循謂方居機密不宜與皇子婚而陰使人以已女裴皇
子宋王從厚重誨惡之出爲忠武軍節度使徙鎮橫海卒年四
十八贈太尉 殷本姓蔣幼爲王重盈養子冒姓王氏梁初取
河中表殷牙將尤愛之太祖下襄陽轉攻淮南還屯正陽哀帝
嘗遣勞其軍素與友珪善拜武寧軍節度使末帝以友璋代殷
殷懼不受代叛附于吳詔削官爵遣牛存節劉鄩討之舉族自
燔死

間曰弑逆大奸春秋特忌峻法深誅不寧一斃餘臭至今
潛然出涕

張文蔚字右華河間人祖居卿父楊弟濟美貽憲并子俱登進

士居卿累歷郡守楊初任壽州判官太原掌書記大中期爲司勳員外與僕射于琮善尋爲翰林學士知制誥中書舍人戶部侍郎進承旨終太平軍節度觀察等使文蔚自幼以文行知名居家孝弟及第爲翰林學士承旨昭宗微弱制度廢能守大體制詔四方遷洛拜中書侍郎同平章事梁初制度多所裁定開平二年留守西都以暴疾卒贈右僕射子鑄字司化除集賢校理拜監察御史後唐爲起居郎右司員外金部郎中賜金紫晉少帝改河南令周爲左諫議大夫給事中檢校禮部尚書宋初加刑部尚書卒年七十二性清介美姿儀善筆札由晉以來天地宗廟及上徽號封拜王公問文皆其所書生平不事生產卒時鬻錢以葬

張策字少逸河西燉煌人幼時落髮爲僧居長安慈恩寺黃巢

犯長安乃返初服奉父母以避亂爲人聰悟好學時通經史父同爲唐客管經略使居洛陽敦化里浚井得古鼎銘曰魏黃初元年春二月匠吉千策正其謬曰漢建安二十五年曹公薨於元延康是歲十月文帝受禪始改黃初元年無二月也衆服其該博召拜廣文館博士辟王行瑜觀察支使李克用攻行瑜與婁肩與其母東歸行積雪中行者憐之梁祖又辟鄭滑支使母喪服除爲唐膳部員外郎韓建華州判官從徙許州令掌書記聘于梁祖見之而喜留不遣亦爲掌書記薦拜中書舍人翰林學士禪位遷工部侍郎開平二年拜刑部侍郎同平章事轉中書侍郎以風恙罷爲刑部尚書致仕卒

薛貽矩字熙用河東聞喜人仕唐爲兵部侍郎翰林學士承旨坐嘗爲韓全誨等作畫像贊左遷乃自結於梁太祖薦於朝拜

吏部尚書遷御史大夫天祐三年梁祖自長蘆還軍哀帝遣往勞師輒以臣禮見祖揖之升階辭曰殿下功德及人三靈改卜皇帝方行舜禹之事臣安敢違卽稱臣拜舞祖側身避之貽矩還趣哀帝遜位受禪拜中書侍郎同平章事累加司空凡相梁五年卒贈侍中

蘇循爲人巧佞阿諛無恥惟利是趨事唐爲禮部尚書哀帝時舊臣皆憤惋切齒或俛首畏禍去而不仕循特傳會以希進用倡言梁王功德天命所歸宜卽受禪于楷乾寧中及第昭宗遣學士陸展覆落之常懷慙恨梁以爲起居郎與張延範等議駁昭宗諡以爲不當梁祖受禪置酒玄德殿盛稱功德順天應人自以爲得所託旦夕引領希見進用而敬翔惡之語太祖曰梁室新造宜得端士以厚風俗循父子皆無行不可立於新朝於

是勒歸田里。復依河中朱友謙。友謙叛梁降晉。晉王將卽位。求唐故臣以備百官之闕。友謙遣循至魏州。時梁尚未滅。晉王意雖銳。將相大臣未有贊成其謀者。循始至望州。屏聽事。卽拜謁之。拜殿及入。謁舞。蹈稱臣。晉王大悅。明日又獻書。日筆三十管。王益喜。因以爲節度副使。已而病卒。楷同光中爲員外郎。明宗卽位。大臣欲理其駁諡之罪。遂以憂死。

裴廸字昇之。河東聞喜人。爲人明敏。善治財賦。精於簿書。唐司空裴瑒判度支。辟爲出使巡官。都統王鐸鎮滑州。奏爲汴宋鄆等州供軍院使。又辟租庸招納使。梁祖鎮宣武。辟節度判官。用兵四方。常留以調兵賦貨財。獄訟一切任之。王師範謀襲汴。遣健卒苗公立持書。臣謁虛實。廸召公立問東事。見其色動。屏人密詰。因得所謀。廸不服。啓卽遣朱友寧以兵巡兗鄆。以故師範

雖竊發而事卒不成太祖自岐還入見時將吏皆賜迎鑾叶贊功臣祖謂此功惟裴公有之他人不足當也唐累遷太常卿哀帝時梁兵攻壽春無功而還帝遣廸勞軍梁祖急於禪代性愈躁見廸怒甚卽位召拜右僕射居一歲告老以司空致仕卒于家

韋震字東卿雍州萬年人初名肇昭宗賜今名爲人彊敏有口辯事梁爲都統判官申叢執秦宗權欲自獻京師又欲挾宗權奪其兵太祖遣震入視還白叢不足慮爲其謀者牙將裴涉安庸人也叢果爲郭璠所殺以宗權歸太祖欲張大其事遂請獻俘朝議時溥破黃巢獻馘而已宗權不足俘請所在斬決震奏事京師往復論列卒俘宗權太祖德之表爲節度副使昭宗幸石門遣由兢略問道奉表行在時方攻吳敗于清口太祖懼諸

鎮乘間圖已諷杜洪鍾傅王師範錢鏐等薦已爲元帥兼領鄆州昭宗初不許以震盪辨敢大言不遜卒許之太祖遂兼四鎮表震鄆州留後及遷洛又入爲河南尹六軍諸衛副使以病瘖守太子太保致仕受禪改太子太傅末帝加太師卒

間曰盜以爲興物各因類不存從諛其何能濟

朱珍徐州豐縣人少與龐師古葛從周霍從丁會俱從黃巢爲盜後降太祖其爲將善治軍選士太祖初鎮宣武爲創立軍制選將練兵甚有法凡得諸將所募及他降兵皆以屬珍所選將皆可用自敗黃巢破秦宗權東并兗鄆勇出諸將未嘗不在上源驛之謀晉王亡去其麾下兵珍悉殺之義成軍返安師儒遣與李唐賓以兵趨滑州乘大雪備弛疾馳至城下遂下之宗權遣張旌等來攻拜珍滑州刺史募兵於淄青得士萬餘馬數百

匹以歸太祖喜曰賊在郊若踐吾麥奈何幸晁等度吾兵少息兵養勇今珍至吾事濟矣宜出其不意擊之宗樞遂敗梁得珍兵軍威大振從攻朱宣取曹州執其刺史丘弘禮俄取濮州刺史朱裕奔鄆太祖還汴留攻鄆州裕詐爲降書珍信之夜率兵叩城開門內珍甫入甕城垂門發軍皆死珍僅以身免太祖不加責魏博軍亂囚樂彥貞復遣往救破黎陽臨河殺魏豹子軍二千於臨黃威振河朔魏人殺彥貞珍乃還將攻徐州遣先下豐縣敗時溥於吳康與李唐賓等屯蕭縣唐賓者陝人爲尚讓偏將後降太祖常從攻掠四方與珍威名略等而驍勇過之珍每小却得其助反大勝太祖以珍嘗私迎其家置軍中疑有異志遣唐賓伺察之遂與不協唐賓不能忍夜走還宣武珍單騎追之交訴於前祖兩惜其材爲和解之及屯蕭縣聞太祖將

至珍戒軍中治館廐以待唐賓部將嚴郊治廐失期軍吏督責
言語相犯珍怒拔劍逐唐賓斬之以反開告者晨至敬翔恐暴
怒不可測匿其人至夜使見冀得少緩而圖之既夕引見太祖
大驚然已夜不能有所發翔因從容謀畫請如珍軍伺出迎謁
命武士執之諸將霍存等十餘人叩頭救珍太祖大怒舉方牀
擲之珍遂縊死

龐師古曹州南華人爲人謹慎從鎮宣武初得馬五百匹爲騎
兵以師古將之自微迄顯未嘗離左右爲將出兵受方略以行
軍中尺寸不敢妄動從破黃巢宗權皆有功攻時溥未下留兵
使守之遂取宿遷進屯呂梁敗溥兵二萬斬首二千級復遣渡
淮攻孫儒爲儒所敗命與霍存分將朱珍唐賓兵會李友裕兵
亦以蜀之攻破徐州以爲留後攻鄆州徹木爲橋臨濟水夜以

中軍先濟下其城復遣攻楊行密兵出清口其地卑陷或請就高爲柵以非上命不聽淮人決水浸之兵不能戰見殺

葛從周字通美濮州甄城人從攻蔡州太祖墜馬扶復騎與敵步鬪傷面身被數鎗偏將張延壽從旁擊之得與俱去太祖盡黜諸將獨用從周延壽爲大將宗權掠地潁亳及梁兵戰于焦夸從周獲其將王涓從朱珍募兵淄青遇東兵輒戰所得兵其功居多李罕之名晉兵攻張全義遣與丁會等往救潞州將馮霸殺李克修來降又使往守晉兵來攻力不能拒走河陽太祖攻魏州與丁會先下黎陽臨河敗魏兵於永定橋攻宿州以水浸其城破之攻朱瑾未下留圍兗州瑾閉壁不出陽爲退避夜半潛還瑾信其已去出兵收外壕隨掩擊之殺千餘人晉攻魏魏人求救已遣侯言築壘于洹水鑿三閘門以待太祖怪其不

出遣從周往代以精兵自閭門出擊敗晉兵晉王怒自將擊敗
從周從攻鄆州擒朱宣下兗州以爲留後命出安豐攻淮南還
至淝河遇淮追兵亦爲所敗時晉兵出攻相衛太祖命略地山
東五日之間下洺州斬刺史邢善益又下邢州走刺史馬師素
下磁州殺刺史袁奉滔表其功兼邢州留後劉仁恭屠貝州羅
紹威求救從太祖入于魏仁恭攻館陶門使將五百騎以出閉
門而後戰曰大敵在前何可返顧破其八柵燕兵走追至于臨
清擁之御河溺死甚衆擢爲宣義行軍司馬遣攻劉守文仁恭
來救監軍蔣暉不欲迎戰從周不聽勒兵逆于乾寧與戰老鴉
堤大敗之斬首三萬餘級獲其將馬慎交等百餘人馬三千匹
守文復求救于晉晉爲攻邢洺以牽之從周遽還敗晉兵于清
山從攻鎮州下臨城王鎔乞盟以功遷泰寧軍節度使受禪拜

左金吾衛上將軍有疾致仕居于偃師末帝改節昭義軍封陳留郡王卒贈太尉

霍存洺州曲周人爲將驍勇善騎射宗權攻汴存以三千人夜破張距柵又以騎兵破秦賢殺三千人從朱珍掠淄青龐師古攻時溥皆有功獲溥將石君和等五千人葛從周引水灌宿州存大戰城下遂下之從攻潞州與晉人戰馬牢川出當其前入爲內殿晉人乃却東攻魏取淇門殺三千人得曹州拜爲刺史兼諸軍都指揮使攻鄆州朱瑾來救諸將勸太祖縱瑾入郭耗其食堅壁勿戰可以俱弊祖曰瑾來必與時溥俱不若遣存邀之乃令伏兵肅縣璚果與溥俱出遇伏擊之遂敗瑾等於石佛山俄中流矢卒祖思之不忘卽位後閱騎兵於繁臺顧諸將泣曰使存若在豈勞吾親閱哉

張存敬譙郡人爲人剛直有膽勇少事太祖爲將善因危窘出奇計以救晉人攻張全義裴爲諸軍都虞候攻徐兗又爲行營都指揮使偕葛從周戰老鶚堤敗劉仁恭還攻王鐸入鎮州城取牛馬萬計遷宋州刺史從攻幽州取瀛莫祁景四州攻定州與王處直戰懷德驛大敗之枕屍十餘里鎮定已下王珂尚在河中太祖恐終貽患語存敬曰珂恃太原侮慢我爾持一繩爲我縛之存敬渡河出含山絳州刺史陶建釗晉州刺史張漢瑜皆降以何稠代之珂乞師太原爲細所迫不得進卒降王珂表爲護國軍留後復徙宋州未至卒贈太傅子仁恕有孝行事親曲盡恩禮從兄仁賴山告反面一如事父曉法令事梁唐晉常爲大理卿卒贈秘書監

符道昭蔡州人本宗權騎將敗後依鳳翔李茂貞養以爲子冒

姓名李繼遠梁攻茂貞出兵屢敗乃歸于梁表爲泰州節度使
遇亂不果行太祖爲元帥開府與李周彝爲左右司馬助羅紹
威誅牙兵破魏將左行遷史仁遇叛兵皆盡其爲將勇於犯敵
而少威算每戰先發多敗必周彝等繼之乃勝後與康懷英等
圍潞州逾年不能克晉兵攻破夾城道昭戰死

劉捍開封人爲人明敏有威儀善偵贊初爲宣武客將從朱珍
募兵後與王銘連和并降王處直皆令單騎入慰圍鳳翔入見
茂貞計事昭宗召問梁軍中事稱旨賜以錦袍拜登州刺史賜
號迎鑾毅勇功臣攻淮南遣先之淮口築馬頭下浮橋以渡軍
後出光山攻壽州又使作浮橋于淮北以渡歸師攻刺宋州受
禪遷左天武指揮使歷元從親軍都虞候左龍虎統軍出爲佑
國軍留後劉知俊反誘捍執送茂貞見殺太祖哀之贈太傅

寇彥卿字俊臣開封人世爲宣武牙將太祖初就鎮以爲通引
官累遷右長直都指揮使領洺州刺史嘗遣之魏計事陰爲紹
威畫計悉誅牙兵其人身長八尺隆準方面語音如鐘工騎射
好書史性復明敏善伺太祖意動作皆如旨以是甚愛之賜以
所乘馬一丈烏嘗語敬翔劉捍寇彥卿皆天爲我生之圓鳳翔
以爲都排陣使會謀遷都昭宗不許太祖遣彥卿奉表迫請悉
驅長安居民以東皆折屋爲筏浮渭而下道路號哭斥太祖名
罵帝亦頓瞻陵廟徬徨不忍去相與泣下沾襟復因何后方娘
頗留華州待冬而行太祖大怒傾彥卿曰汝往趣官家不可一
日留彥卿復馳至華卽迫上道受禪拜感化軍節度使歲餘名
爲左金吾衛大將軍充街仗使素好誅殺多猜忌怙寵作威晨
朝至天津橋民梁現不避道梓殺之詔以錢償現家御史崔沂

劾奏請論如法賞授左衛中郎將復拜相州防禦使遷河陽節度使書太祖像弒後事之如生嘗對客語及必涕泗交下末帝徙鎮咸勝卒年五十七

康懷英兗州人初爲朱瑾牙將以兗城降太祖德之大喜使從氏叔琮攻趙匡凝下鄆州從攻李茂貞爲先鋒至武功擊殺岐兵萬餘太祖喜曰邑名武功真不妄也賜以名馬又破李周鄆鄆坊兵救岐者因取翟州而還岐兵往奉天屯在東北夜半來攻懷英不欲驚他軍獨引二千人出戰遲明解去身被十餘創昭宗還京賜號迎鸞毅勇功臣楊行審攻宿州遣擊走之表爲招討使將行太祖戒語甚切懷英惶恐期必得潞乃築夾城爲蚬蜃塹以固之晉遣周德威攻夾城懷英不敢出代以李思安亦無功太祖大怒以同州劉知俊爲招討使未至太祖自至

澤州爲懷英等聲援且督之已而晉王卒太祖歸洛諸將方少
弛莊宗與德威等出其不意攻破夾城懷英大敗以百騎遁歸
詣闕請死太祖謂去歲與兵太陰虧食占者以爲不利吾獨違
之此敗非爾過也釋之以爲右衛上將軍知俊拔奔于岐拜保
義軍節度西路副招討使復遇以岐兵圍靈武承命攻邠寧以
卒之還至昇平爲知俊掩擊大敗徙鎮感化又討朱友謙戰于
白徑嶺連敗徙承平鎮卒

劉鄩密州安丘人少事青州王敬武父子以斬叛將盧洪破棣
州張瞻功表登州刺史爲行軍司馬師範敗梁祖攻鳳翔乘虛
遣人分襲州縣謀多漏洩獨鄩素有機略適兗州葛從周將兵
在外鄩使人以密油爲名入視城中虛實出入所由得羅城下
水竇空缺潛引步兵五百從此入據之徙從周家屬外第親拜

其母撫之有恩。及從周還攻母於城上。呼曰。劉將軍待我甚厚。人名爲其主。汝可察之。從周爲之緩攻。郭悉簡婦人及老疾者。出之。獨與少壯者同。辛苦分衣食。堅守以待外援。久之不至。人心頗離。守陴者多逸。副使王彥溫亦踰城而奔。郭陽下令。謂副使已所遣行。餘非所遣而行者。皆坐族誅。城中疑惑。奔者乃止。已而梁兵聞之。果疑彥溫非實降者。斬之。由是城守益堅。會師範兵已屈從周。以禍福諭郭。報曰。俟吾主降。卽以城還。及降太祖。賜之冠帶。以爲元從。都押衙禪位。累遷左龍武統軍。劉知俊陷長安。遣與牛存節討之。建長安爲永平軍。拜郭節度使。未帝收鎮南軍。開封尹又改義成軍。議分相魏爲兩鎮。恐兵亂。遣屯魏縣。善以機變。用兵。晉兵從莊宗入魏。郭謂太原可襲。潛軍出黃澤關。至樂平。遇雨不進。而旋屯于莘縣。築甬道及河以饋軍。

諸將右光化二年權知邢州歷萊曹二州刺史左衛左驍衛二
上將軍右龍虎統軍開平二年領河陽節度使以疾卒女爲末
帝德妃子漢傑以妃故居中用事爲顯官 歸厚字德坤爲將
善用弓槊能以少擊衆嘗與張珪獨戰陣前珪憊而却諸將乘
之遂大敗太祖大悅拔爲騎長攻時溥以麾下先進九里山見
梁故將陳瑋叛在徐臚目大罵馳騎直往取之矢中左目攻鄆
州使友裕屯濮太祖從後至與相矢卒與敵遇登高望之纔千
人祖與歸厚以應子軍直衝之戰已合鄉兵大至歸厚度不能
支以數十騎衛太祖先還馬中矢持槊步關太祖亟遣張筠馳
騎往取以爲必死歸厚體被十餘箭得筠馬乃歸太祖見之泣
曰爾在喪軍何足計乎使昇歸宣武遷右神武統軍歷洺晉絳
三州刺史與晉人屢戰未嘗敗屈乾化元年拜鎮國軍節度使

以疾卒于漢卿 歸升爲將亦善戰開平初爲滑州長劍指揮使子漢融梁亡與漢傑皆族誅

王重師許州長社人沈默多智善劍梁秦宗權陷許脫身歸梁從平蔡攻兗郛爲拔山都指揮使苦戰齊魯間威震鄰敵遷潁州刺史攻濮州城已破濮人焚積草兵不得入使壯士持短兵取軍中毬琰沃以水蒙之突入兵咸隨之入城身被八九創軍士負之而還太祖聞之驚曰奈何使吾得濮州而失重師乎命醫治之逾月乃愈王師範降表爲青州留後累遷佑國軍節度使同平章事居數年甚有威惠故與劉捍有隙嘗搆之太祖會遣將張君練攻邢鳳兵小敗以不先白疑爲擅發挫失國威將名而罪之遣捍往代重師不知上怒捍至不出迎見之青門禮又倨捍因馳白重師有二志太祖益怒貶爲溪州刺史再貶崖

州司戶未行賜死

徐懷玉亳州焦夸人少與太祖俱起微賤爲將以雄豪自任勇於戰陣從鎮宣武爲永城鎮將秦宗權攻梁壁金隄靈昌酸棗以輕騎連擊破之俘殺五千餘人遷左長劍都虞候又破宗權於板橋赤岡拔其八柵東攻兗郛破徐宿金鄉金剛被體戰必克捷爲梁名將所得賞賚悉以分士卒本名琮太祖賜改今名從攻魏破黎陽攻揚州獨完一軍收師古散卒萬餘以歸遷沂州刺史屬歲豐繕兵治壁爲戰守具屢以州兵擊破王師範遷齊州防禦使天復四年西迎昭宗都洛陽遷華州觀察留後命屯雍州又轉右羽林統軍屯澤州晉人來攻爲隧以入與牛存節迎擊隧中却之後歷曹晉二州刺史晉數來攻堅守敗之于洪洞拜保大軍節度使朱友謙以兵襲鄆州被執見殺

楊師厚潁州斤溝人少事李罕之及降還其麾下勤卒百人獻于晉師厚在籍中無所知名復奔于梁爲宣武押衙從攻王師範戰于臨朐擒偏將八十餘人又取棣州拜齊州刺史攻趙匡凝爲先鋒取穀城西童山木爲浮橋渡漢水匡凝棄城走進攻荆南莊明又遁拜山南東道節度同平章事劉知俊攻陷長安師厚以奇兵旁南山入西門降其守者遂克之周德威攻晉州以應如俊復敗之于蒙院以功累遷保義宣義二軍是時梁兵攻趙久無功太祖病臥洛陽少間自將師厚從至汧水夜行迷失道明旦次魏縣聞敵將至梁兵亂不可止久之乃定已而疾又作遂還明年晉軍攻燕劉守光求援太祖爲擊趙以牽晉屯于龍花遣師厚攻棗強不能下太祖怒自往督戰城破屠之進圍蓆縣晉史建瑋以輕兵夜擾梁軍大亂皆棄輜重南走太祖

還東都留師厚屯魏州旣而遇弒友珪自立師厚乘間殺魏牙
將潘晏滅延範等遂節度使羅周翰拜爲天雄軍節度使自太
祖與晉戰河北嘗命爲招討使悉領梁之勁兵珪陰欲圖之名
入計事部吏田溫等勸勿行師厚曰吾二十年不負朱家今若
不行則見疑而生事然吾知上爲人雖往無如我何也乃入朝
留勁兵二萬於城外以十餘人自隨入見友珪果懼賜鉅萬而
還及末帝謀討友珪趙巖獻計此事成敗在招討楊公得其一
言諭禁軍吾事立辦乃遣馬慎交陰見師厚布腹心師厚猶豫
未決謂其下曰方郢王弒逆時吾不能卽討今君臣之分已定
無故改圖人謂我何其下曰弒逆天下之惡均王仗大義以誅
賊其事易成若一朝破賊公將何以自處師厚大悟同謀起兵
使朱漢賓屯滑州以應袁象先遂殺友珪末帝卽位封爲鄴王

詔書不名事無巨細皆以諮之然心益畏忌無何以瘍卒末帝
更爲之賀始分相魏爲兩鎮軍亂以魏博降晉自此始失河北
王景仁廬州合肥人初名茂章少從楊行密爲將驍勇剛悍略
無威儀臨敵務以身先士卒行密壯之梁祖遣子友寧攻青州
師範乞兵行密遣以步騎七千赴之背城分兵爲兩柵友寧夜
擊其一柵柵中告急趣出戰景仁按兵不動遲明度其已困乃
出戰大敗之遂斬友寧以其首奔行密太祖方攻郢聞之引兵
二十萬倍道而至景仁閉壘示怯伺梁兵怠毀柵而出驅馳疾
戰已酣退坐召諸將飲酒良久復戰梁兵又敗太祖登高望見
嘆曰使吾得此人天下不足平也伺其軍還急命追之景仁度
不可走遣裨將李虔裕留五百兵不行以死遇之追兵至虔裕
一軍盡覆而景仁得全軍以歸虔裕見梁祖欲釋之瞋目大罵

而死後景仁代行審子渥守宣州渥求故時宣州物惜不與渥
怒以兵攻景仁遂奔錢鏐鏐復表領宣州節度使太祖以素識
遣人名之間道歸梁加同平章事仍使領寧國軍久之未有以
用開平四年爲北面招討使將魏滑汴宋等兵七萬伐趙行至
魏州司天監奏太陰虧不利行師乃亟召還已過邢洺進營於
柏鄉及晉人戰大敗景仁歸譖韓勣李思安輕其爲客不從師
度乃罷就第末帝立以爲淮南招討使使攻廬壽軍過獨山有
行審嗣再拜號泣而去戰于霍山梁兵敗走景仁殿而力戰以
故不甚敗歸京師病疽卒贈太尉

賀瓌字光遠濮州人事朱瑄爲都指揮使梁攻兗州遣與何徽
賀柳存等將兵萬人往救瓌趨待賓館欲絕梁餉道太祖得降
卒言以六壬占之吉夜選精兵疾馳期先至待賓以逆瓌而夜

黑兵失道旦至鉅野東遇瑒兵擊之大敗走梁兵急追之瑒登塚上自呼其名可勿殺我太祖馳騎取之并懷寶等數十人降其卒三千餘是日大風揚沙蔽天太祖以爲天怒因盡殺降卒而繫瑒及懷寶等至兗城下以招瑒瑒不納復斬懷寶等十餘人而獨留瑒瑒感不殺誓以身自効從平青州以爲曹州刺史禪位累轉相州末帝遷左龍虎統軍轉宣義軍節度使晉攻河北命爲招討使與謝彥章屯于行臺晉軍迫瑒十里而柵相持百餘日以隙殺彥章莊宗喜曰將帥不和梁亡無日矣乃令軍中歸其老疾于鄴以輕兵襲濮州瑒自行臺攝之戰于胡柳陂晉人輜重在陣西瑒軍薄之晉軍亂斬大將周德威盡取輜重瑒軍已勝陣無石山日暮晉兵仰攻之瑒復大敗晉遂取濮州城德勝夾河爲柵瑒以舟兵攻南柵不能得還軍行臺以疾卒

年六十二贈侍中子光國 謝彥章許州人幼事葛從周見其敏慧養以爲子授之兵法以千錢置大盤中爲行陣什伍之狀并示出入進退之節彥章盡得之及壯事太祖爲騎將時賀瓌善川步卒而彥章與孟審澄侯溫裕皆善將騎兵二人所將不過三千彥章多而益辨末帝累遷匡國軍節度充賀瓌軍前排陣使其爲將好禮儒士雖居軍中常儒服臨敵御衆肅然有威左右馳驟疾若風雨晉人望其行陣齊聲謂謝彥章必在此其名重敵中瓌心忌之一日行視郊外瓌指一地可以營柵已而晉兵柵之瓌疑彥章陰以告晉益惡之又與馬步都虞候朱珪有隙瓌欲速戰彥章請持重以老敵珪乃誣彥章以爲將反瓌且享士使珪伏甲殺之審澄溫裕皆見害

王植字衆美京兆人少爲梁小校與尚讓戰尉氏門勇山諸將

太祖奇之遷踏白副指揮使從朱珍募兵戰數有功梁與蔡兵戰板橋李重裔馬路爲蔡兵所擒檀馳取之并獲一將從太祖破內黃遷衝山都虞候復從珍攻徐州獲其將一人攻王師範以一軍克密州拜爲刺史禪位遷保義軍節度使王景仁敗於柏鄉晉兵圍邢太祖大懼欲自將救之賴檀力戰卒全邢州以功加同中書門下平章事封瑯琊郡王友珪募徙鎮宣化貞明元年又徙匡國謀以奇兵西出陰地襲太原不克而還又徙天平爲所招帳下亡盜所殺年五十八贈太師諡忠毅

馬嗣勳濠州鍾離人少爲州客將材武有辨太祖攻濠刺史張遂遣持牌印出降楊行密攻遂又使乞兵梁兵未至濠州已沒嗣勳乃留事太祖以爲宣武軍元從押衙西攻鳳翔行至華州遣入說韓建卽降羅紹威誅牙軍來乞兵適梁女嫁紹威子廷

規而卒太祖陰遣嗣勳以長直千人爲綵輿入魏置兵器輿中
聲言助葬館于銅臺夜與魏新鄉鎮兵攻石柱門入迎納戚家
屬衛之益取魏甲兵攻牙軍牙軍不知兵所從來莫能爲備殺
其八千餘人遲明皆盡嗣勳中創亦卒贈太保

王虔裕瑯琊臨沂人爲人健勇善騎射以弋獵爲生少從諸葛
爽起青棣間兵敗降黃巢後又隨爽奔梁時太祖新就鎮未有
他將以虔裕將騎兵嘗爲先鋒擊巢陳蔡間拔其數柵巢走梁
兵躡之戰于葛勝戎有功表爲義州刺史秦宗權攻許鄭與梁
爲敵境大小百餘戰常有功以拒秦賢於尉氏戰敗失一裨將
太祖怒拘于軍中邢州孟遷降梁爲晉所圍復遣以精兵百人
疾馳夜破晉圍入邢州遲明立梁旗幟於城上晉人以爲救至
乃退已而晉兵復來遷執虔裕降于晉遂見殺

冊曰梁興一劔諸將雲從高鳥之驚走狗之功

弘簡錄卷七十七

載記 五代唐一

太祖李克用

莊宗李存勗

明宗李嗣源

愍帝李從厚

廢帝李從珂

唐之先本西突厥別部處月種族居金娑山之陽蒲類以東有大磧名沙陀故以爲號太宗立突厥利鄰可汗率之入朝其留者統以射墮子賀魯後亦來降徙其部廷州之莫賀城處月朱邪閼俟斤阿厥亦請入屬朱邪之號始見永徽初賀魯反朱邪孤注與連和殺招慰使引兵據牢山沙陀那連等不肯從高宗以賀魯所領授之明年總管梁建方契苾何力引兵攻討衆潰

追奔五百里斬孤注上首九千級禽其帥六十送摩瑤池都督
府卽處月地置金滿沙陀二州皆領都督賀魯亡處月酋沙陀
金山來降龍朔初從薛仁貴討鐵勒授金山墨離軍討擊使長
安二年進金滿州都督累封張掖郡公金山死子輔國嗣先天
初避吐蕃徙部北廷率衆入朝開元二年復領金滿州都督進
爵永壽郡王母昆尼施封鄯國夫人死子骨咄支嗣天寶初命
兼回紇副都護從平安祿山拜特進左驍衛上將軍死子盡忠
嗣遂以朱邪爲姓累遷金吾衛大將軍酒泉縣公至德寶應間
中原多故道不通朝奏使假道回紇北廷多漁獵沙陀苦之貞
元中宰相帳七千附于吐蕃與共攻陷北廷吐蕃徙其部甘州
以盡忠爲大論凡遇入寇倚爲前鋒久之疑盡忠持兩端議徙
之河外盡忠與子執宜謀曰。我世爲唐臣。不幸陷汚。今若走蕭

關自歸。不愈于絕種乎。元和三年。悉衆三萬落。循烏德韃山而東。吐蕃追之。行且戰。掠其部衆。盡忠遂死。執宜哀癘傷。士歿靈州。塞節度使范希朝以冊詔處其部。鹽州置陰山府。以執宜爲兵馬使。希朝欲籍其健鬪。以捍邊。爲市牛羊。廣畜牧。休養其童。老弟葛勒阿波亦率殘部七百叩振武。降授左武衛大將軍兼陰山府都督。執宜來朝。賜金幣袍馬。萬計。授特進金吾衛將軍。議者以靈武逼近吐蕃。恐反覆。生變。移希朝鎮太原。因詔沙陀舉軍從之。希朝料勁騎千二百號。沙陀兵而處其餘衆于定襄。執宜保神武川之黃花堆。更號陰山北沙陀。從伐鎮州。爲前鋒。與王承宗兵遇于木刀溝。提軍鏖鬪。橫貫賊陣。李光顏等乘之斬首萬級。進蔚州刺史。部族羣熾。太原王鐸請析其族隸諸州。建十府以處之。八年。回鶻過磧南。取西城柳谷。詔執宜屯天德。

會伐吳元濟使隸光顏軍拔凌雲柵平日授檢校刑部尚書長
慶初留宿衛太和中柳公綽奏廢十府料部人三千禦北邊號
代北行營授執宜招撫使死于赤心嗣開元四年回鶻相掘羅
勿遣以良馬三百約共攻彰信可汗節度使劉沔復與擊回鶻
于殺狐山討劉稹又以兵從遷朔州刺史仍領代北軍使大中
初吐蕃党項及回鶻殘衆寇河西太原王宰統以進討所向披
靡吐蕃自嘆失其所倚悲曰吾見赤馬將軍火生頭上自是吐
蕃遂衰宣宗復三州七關特授赤心雲州守捉使厯勛亂引突
騎三千從康承訓會承訓遇伏幾沒以五騎脫出之俄勦勁騎
突賊與官軍夾擊敗勛衆八萬其弟赤衷復追助於亳東勛平
進大同軍節度使賜姓李名國昌預鄭王屬籍賜甲第親仁里
子卽克用少驍勇尤精騎射能仰中飛鳬威名蓋於代北回鶻

叩榆林投靈鹽移國昌郡延節度又寇天德徙節擬武進檢校
司徒王仙芝陷荆襄遣劉遷統雲中騎突賊有功乾符三年雲
州防禦段文楚兼代北水陸發運值歲艱餒損用度下皆怨邊
校程懷信王行審蓋寓李存璋薛鐵山康君立等謀議世方多
難丈夫當投罅立功段公乃儒者難與共計惟李振武父子勇
冠軍中若能推之則代北唾手可定取富貴若拾芥爾衆咸曰
善至夜來謁告以歲艱食削吾屬不忍餓死公家威德著聞請
誅虐帥安部內克用許之募士得萬人執殺文楚入據雲州州
人丐克用爲留後僖宗不許發諸道兵討捕不甚爲力而黃巢
方引兵渡江度未能制乃赦之拜國昌大同軍防禦使稱疾拒
命詔河東崔彥昭幽州張公素共討無功國昌與党項戰大同
川未決赫連鐸襲振武盡取其貲國昌窮蹙挈五百騎還雲州

不納鐸遂取之克用哀殘兵三千屯新城鐸引萬人隧而攻之
三日不拔殺傷甚衆國昌自蔚州來援鐸引去兵勢復振北據
蔚朔南侵忻代至于大谷僖宗授鐸大同節度使會幽州李可
舉攻蔚州國昌當以一隊復詔李筠爲北面招討使督潞州太
原兵屯代州克用分兵抵遮敵城拒鈞會大雪士凍仆遂潰鈞
死于兵廣明元年李琢代爲招討克用使傅文達調蔚朔兵朔
州刺史高文集縛以送琢國昌兵敗其叔友金以蔚州降克用
聞之遽還可舉追至藥兒嶺又敗之舉宗亡入遼和鐸密諭會
長圖之克用覺其謀大會豪傑馳射百步外以示武勇針芒木
葉無不破裂會大驚阻因倡言今黃巢爲忠天子一日救我願
與公等南向定天下庸能終老沙磧哉值京師陷詔河東監軍
陳景思發沙陀薩葛吐渾諸部入援至絳州時友金方爲代州

都督刺史罷稹說以募士三萬屯隴西士眾縱不能制友金謀
曰今合大眾不得威名宿將安能有功吾兄國昌已老其子材
雄衆所推畏若名使將兵一鼓而南賊不足平也景思曰善奏
乞赦其父子促本軍討賊賊罪詔拜克用代州刺史忻代兵馬
留後募達靼萬人趨代州取道太原節度使鄭從讜塞石嶺關
不得前從間道造城下邀糧貨不達復大掠還屯代州蔚州刺
史蘇祐會鐸兵將攻之反爲所襲下蔚州祐屯美女谷鐸與可
舉來攻復燔府庫棄而去屯于雁門國昌亦率兵歸代州投汾
并樓煩不釋鎧帝詔克用還軍朔州王處存王重榮以書招之
克用喜卽大閱得忻蔚朔并達靼衆三萬騎五千自陰地趨晉
會河中帝聞擢拜雁門節度神策天寧軍鎮遏忻代觀察等使
自夏陽濟河敗賊將黃鄴於石堤谷又敗趙璋尚讓于梁田坡

合諸軍大戰渭橋賊敗走入城乘勝追之京師平論功第一拜
檢校司空同中書門下平章事封隴西郡公國昌爲代北軍節
度使未幾領河東節度使是歲國昌卒遣弟克修攻孟方立取
澤潞二州別建邢洺磁三州爲昭義軍巢與秦宗權合寇河南
復率河東代北兵由河中趨許州合徐汴兵破尚讓于太原又
破黃鄴于西華巢敗走與連戰中牟封丘河南平追北曹州一
日夜馳三百里至于冤句不及而還過汴朱全忠邀飲宴留兵
封禪寺舍于上源館全忠自佐襄進貲寶握手諄勞而內忌其
雄不相並立乘其已醉謀害之親將郭景銖滅燭扶匿牀下以
水沃面始寤煌燄四合會大雨而滅與薛志勤等隨電光絕南
譙門脫走部下死者數百所獲乘輿物盡亡之整衆歸太原益
訓兵請報全忠仇使者入往返使弟克勤以萬騎屯河中內外

震恐僖宗使內謁慰解尋進位檢校太傅隴西郡王自將救王處存幽鎮之兵皆敗走之復詔以兵護處存赴河中王重榮僞爲詔書給言與處存同誅克用謀由全忠克用信以爲然表言邠寧朱玫鳳翔李昌符連全忠爲亂請以兵渡河殲二豎然後手汴以雪恥帝連遣使慰止不從戰于沙苑敗遂犯京師縱兵大掠僖宗奔鳳翔乃退還河中與重榮聯章請帝還宮願留兵宿衛帝意欲結克用迫乘輿懼走興元乃歸鎮焚嗣襄王燭僞詔執其使問道奉表以歸行在稍安昭宗卽位進檢校太師兼侍中大順初自攻赫連鐸拔雲州東鄂幽州李匡威救鐸克用敗走其將安全俊被殺鐸與匡威表言克用山南亂首今乘其敗可伐而取乃下制奪官爵削屬籍命宰相張洸總兵鐸與匡威暨王鎔全忠皆爲招討太原將安建請以邢洺等三州歸

順河東叛將馮霸殺潞州守將李克恭獻首闕下。臣威鐸并吐蕃點戛斯衆十萬攻蔚州，并遮鹵軍殺其將劉某子克用。屯渾河川，李嗣源與鐸等戰，樂安皆敗走。潞引禁軍入陰地關，壁汾隰。薛鐵山、李承嗣營洪洞迎戰，三敗之。因禁軍不敢俘，宰相不加害，命退舍五十里。上表自訴，帝爲引咎，優詔復官，加太師兼中書令。明年報怨，以薛阿檀爲前軍，設伏邀鐸，亡入吐渾，遂取雲州。守以部將石善友。八月，大蒐于太原。景福元年，遣李嗣勳敗王鎔兵於堯山，斬首三萬，拔天長，略常山，渡滹沱，燔其外郭，徇地至趙，取鼓葉二城。鐸復攻天城軍，飛檄發太原軍。臣威已壁雲州北郊，引軍自神堆夜入，死戰走之。二年，出兵井陘，與趙通和。乾寧元年，次新城，鐸行詣軍門降，輒而縱之。進下武州，攻新州。臣鐸引兵救之，迎戰，斬首萬級，俘少將三百，徇城下新

州降取媽州匡籍棄城走幽州降以劉仁恭爲留後乃旋王珂兄弟爭立昭宗以克用表在先乃許立珂盡調部兵渡河拔絳州斬刺史王璠復圍華州三鎮連兵犯闕帝幸石門克用營渭橋不進帝遣嗣延王戒丕嗣丹王允告急八月始進軍遣史儼以驃騎三千護石門珂輸粟備行在赤詔嘉答進諸道兵馬都招討使命二嗣王事以兄禮令促討王行瑜乘輿還京衛以兵二千進金具裝二駟給百官喪馬者加邠寧四而行營都統賜以魏國夫人陳氏

陳襄陽人善書帝所愛幸欲急平賊故予之

十一月擊破邠州兵

史儼入城行瑜見殺賜號忠貞平難功臣進封晉王悉諭官屬

及諸子功封爵之還軍雲陽遣李習吉入朝請與珂悉力往討

茂貞帝慰勞俾與解仇以紓國難發度支錢三十萬緡勞其軍

茂貞畏晉見討修貢獻如藩臣俄自將救朱宣假道于魏次莘

縣爲魏兵所破大掠相魏而還茂貞與韓建謀絕貢獻以兵入
朝帝懼詔令入衛京師且謀渡河幸太原韓建劫幸華州王謂
忠本起於不斷願上自爲之帝使延王持節諭曰不用卿計故
逮此無可言者今朕寄於華百司羣官無所託非卿尚誰與憂
否則不復見宗廟矣延王至太原留之累月泣涕以請時晉方
以劉仁恭貳已爲憂姑好辭謝王不復有西意俄自將屯蔚州
會晨大霧冥仁恭薄戰晉兵大敗走大將多死全忠奪邢磁洺
三州茂貞度晉沮撓無能出師與建謀好致書言帝暴露累年
請共治宮室迎天子晉出貲爲助光化初帝還京詔與汴解仇
晉王勢已折尚以功高位全忠上恥先下之而王銘方睦於汴
遣使爲已倡全忠卽遣使奉書幣恭甚王亦報之然汴日益
張窮鬪不置王珙與汴攻河中晉使李嗣昭張漢瑜援之葛從

周取承天軍氏叔琮取遼州樂平進壁榆次晉復使周德威逐
出之嗣昭以步騎三萬下太行略河內拔懷州進攻河陽汴以
閻寶救之天復元年全忠取晉絳降王珂梁遂有河中晉失三
與國首道梗梁知晉進不振乃率魏博兗鄆邢洛義武晉絳之
兵共攻太原分遣叔琮等四面大入晉城邑多下會大雨糧乏
士多瘡瘍解還王雖內憤悒然憚梁強難與爭乃厚致幣馬謝
復請修好梁方謂晉可取答辭甚慢及梁取同華屯渭上帝如
鳳翔召晉入衛王間道遣使者奔同并遣梁王書勸還不答乃
率兵趨平陽攻吉上堡破汴軍於晉州嗣昭德威下慈隰進屯
河中汴將朱友寧兵十萬壁其南梁王自屯晉州晉人聞其至
皆失色時有虹貫德威營叔琮等薄營疾鬪晉兵大敗伏械輜
儲皆盡友寧長驅下汾慈隰州遂圍太原攻西門德威嗣昭循

山道歸王大恐身荷版築拒守居數日散士復集嗣昭夜擾友
寧營汴人引去德威追至白堊關復收三州四年帝東遷加號
協盟同力功臣詔至泣曰乘輿不復西矣遣使者奔問行在改
元天祐以非唐號仍稱天福。茂貞與王建楊崇本遣使來約同
舉義兵王顧藩鎮皆附汴不可與共功惟契丹方強乃修辭名
之阿保機親赴雲中與會約爲兄弟留十日而去遺馬千匹牛
羊萬計期冬大舉渡河會昭宗弑而止唐滅始稱天祐四年建
與楊渥請晉自王一方須賊平訪唐宗室立之仍率蜀工制乘
輿御物答曰自王非吾志也是歲冬有疾城門自壞以三矢賜
子存坊而告之曰梁吾仇也。燕王吾所立契丹與吾約爲兄弟
而皆背晉歸梁此三者吾遺恨也。與爾三矢爾其無忘乃父之
志存場受而藏之于廟。明年堯年五十四葬于雁門存場每用

兵遣從事以少牢告廟。請其矢。盛以錦囊。負而前驅。及凱旋而納之。追上尊號曰太祖皇帝。

莊宗名存勗。小字亞子。太祖長子。五歲時。祖破孟方立。還軍上黨。置酒三垂岡。伶人奏百年歌。至于衰老之際。聲辭悲愴。坐上皆慘悽。祖視存勗在側。獨指而笑曰。吾老矣。此乃奇兒。二十年後。其能代我戰于此乎。甫十一。從破王行瑜。遣獻捷。京師昭宗異其狀貌。賜以鵠鴈。翡翠盤。撫其背曰。兒有奇表。後富貴無忘予家。及長。善騎射。膽勇過人。稍習春秋。通大義。尤喜音聲。歌舞。俳優之戲。梁嘗攻燕。劉仁恭來乞師。太祖恨其反覆。欲不許。諫曰。今天下之勢。歸梁者十七八。彊如趙魏中山。莫不聽命。自河以北。無爲梁患者。所憚惟我與仁恭耳。若燕晉合勢。非梁之福。此吾復振之時也。夫爲天下者。不顧小怨。且彼常困我。而我

急其難。可因以懷之。是謂一舉而兩得。機不可失。太祖以爲然。

乃出兵攻破潞州。梁圍解去。天祐五年正月。嗣王位。

時梁已篡不用其年

號惟以天祐紀年

二月。殺李克寧。周德威自亂。柳引還。與之言曰。晉之

所以能敵梁而使之畏憚者。以有先王在也。今王已喪。度我新

立。未能出兵。意必懈怠。宜出其不意擊之。非徒解圍。亦足定霸

乃出兵趨上黨。過三垂岡。喟然而歎。乘天霧晝暝。攻敗梁軍。破

其夾城。凱旋告廟。九月。遣德威攻梁晉州。捷于神山。六年。梁劉

知俊叛。乞師于晉。自將至陰地關。敗梁軍于蒙阮。七年冬。梁遣

王景仁攻趙王鎔。來乞師。諸將皆疑鎔詐。未可許。王不聽。往救

八年正月。敗梁軍于柏鄉。斬首二萬級。獲將校三百人。馬三千

匹。進攻邢州。不下。留兵圍之。去攻魏。別遣德威徇梁夏津。高唐

攻博州。破東武朝城。遂擊黎陽。臨河。淇門。掠新鄉。共城。會劉守

光大治兵聲言助晉王患之乃旋師七月守光稱帝于燕九年正月遣德威會鎮定攻燕守光求救於梁梁攻趙屠聚彊李存審擊走之八月朱友謙叛梁以河中來降梁遣康懷英討之友謙復臣陰附于晉十年十月守光請降王如幽州復背約遂攻之明年破燕殺守光剖其父仁恭之心以祭父墓始建行臺趙王鎔并王處直共推爲尚書令七月攻梁邢州敗績張公橋十二年魏軍亂賀德倫以魏博二州來附王入魏州行至永濟誅亂首張彥遷其兵五百自衛號帳前銀鎗軍六月取德州兼領魏博節度使七月取涇州劉鄩軍于涇水王率百騎覘其營遇伏圍之數重決圍而出亡其八騎八月梁復取涇十三年正月擊鄆大敗之三月攻梁衛州降刺史來昭克磁州殺刺史靳昭四月克洛州八月圍邢州降節度使閻寶取相與滄州張筠戴

思遠咸棄城遁貝州人殺梁守將張源德以城降契丹入蔚州
執李嗣本十四年寇新及幽州李嗣源擊走之十二月攻楊劉
王自負芻堽湮遂破訃彥章十五年正月與梁相拒于楊劉彥
章決河水以隔晉軍六月渡水擊彥章破其四寨八月大閱于
魏合盧龍橫海昭義安國及鎮定之兵十萬馬萬匹軍于麻家
渡賀瓌彥章軍于行臺十二月進軍臨濮戰于胡柳晉軍敗績
喪大將周德威伺暮復擊大敗之遂軍德勝以鐵鎖斷河口河
南北築兩城號爲夾寨十六年正月王兼領盧龍軍十月廣德
勝北城十二月敗梁軍于河南十八年正月魏州僧傳真獻唐
受命寶三月河中朱友謙昭義李嗣昭橫海李存審義武王處
直安國李嗣源天平閻寶大同李存璋振武李存進臣國朱令
德鎮州張文禮合詞請王卽皇帝位王三辭友謙等三請王曰

予當思之王處直叛附契丹其子都來附十二月契丹寇涿與
定州十九年正月敗之于新城望都追奔至于幽州十月李存
審克鎮州王兼有成德

同光元年四月己巳卽皇帝位大赦改元國號唐以行臺左丞
相豆盧革爲門下侍郎右丞相盧程爲中書侍郎並同平章事
中門使郭崇韜昭義監軍張居翰爲樞密使閏月追尊三代爲
皇帝妣皆皇后曾祖執宜妣崔氏諡昭烈廟號懿祖祖國昌妣
秦氏諡文景廟號獻祖考諡曰武廟號太祖立廟太原合高祖
太宗懿宗昭宗爲七廟壬寅李嗣源取鄆州五月辛酉梁人取
德勝南城六月及王彥章戰于新壘敗之八月梁人克澤州九
月戊辰嗣源敗王彥章十月壬申如鄆州以襲梁甲戌取中都
丁丑取曹州己卯滅梁函末帝及敬翔首獻于太廟還矢先王

告厥成功。

丙戌貶鄧珏萊州蕭瑄登州皆司戶參軍殺李振趙

巖張漢傑朱珪俱滅其族己丑德音降死罪釋流己下十一月

丁巳轉左丞趙光胤中書侍郎韋說禮部侍郎並同平章事十

二月辛巳誅李繼韜其弟繼達殺兄繼儔于潞州二年正月

河南尹張全義及諸鎮進餽殿物己酉求唐宦者庚申如河陽

迎皇太后丁卯祔神主太廟朝獻太徽宮戊辰享太廟二月己

巳朔南郊大赦癸酉羣臣上尊號曰昭文睿武光孝皇帝癸未

立劉氏爲皇后三月庚戌賜平汴功臣及入洛南郊立仗軍士

等庚申命工部郎中李塗檢視唐諸陵潞州將楊立反五月壬

寅敎坊使陳俊爲景州刺史內園栽接使儲德源爲憲州刺史

丙寅李嗣源克潞州六月丙子楊立伏誅己丑封回紇王仁美

爲英義可汗七月己酉如雷山賽天神九月壬子置水乎城門

以禳災。歲十一月癸卯，敗于伊闕。丙午，還宮。三年正月庚子，如東京，毀卽位壇爲鞠塲。二月己巳，柴鞠于新塲。三月乙未，寒食，望祭于西郊。辛酉，改東京爲鄴都，以洛京爲東都。四月旱。五月丁酉，皇太妃薨。廢朝五日。六月辛未，宗正卿李紆爲昭宗升少帝改上園陵，使秋括馬。七月壬寅，皇太后崩。九月庚子，伐蜀。以魏王繼岌爲西川四面行營都統，郭崇韜爲招討使。自六月雨至，于是月流民轉徙京師，賦調不充，命預借明年夏秋租稅。十一月己酉，蜀王衍降，崇韜殺王宗弼及其弟宗渥。宗訓滅其族。十二月己卯，敗于白沙。皇子后妃皆從。癸未，還宮。閏月辛亥，封皇弟存美等七人皆爲王。四年正月甲子，繼岌殺崇韜及其三子于蜀。庚辰，殺其弟睦王存乂及護國軍節度使李繼麟。并將史武、薛敬容、周唐殷、楊師太、王景來、仁白奉國皆滅其族。

二月己丑李紹宏爲樞密使癸巳鄴將趙在禮反甲午陷鄴都命武寧軍節度使李紹榮討之羣臣請李嗣源討賊不許屢請許之邢州軍將趙太反命東北而招討使李紹真討而誅之三月客星犯天庫有流星入於天棊占者言御前當有急兵宜散積聚以禳之博州守將翟建自稱刺史甲子殺王衍滅其族乙丑如汴州嗣源已先入不得進壬申次滎澤甲戌至自葛勝時軍士已離散尚餘二萬人復欲東幸汜水四月丁亥朔郭從謙反劉后弒帝年四十二

冊曰桓文剗霸周室以彊唐祚旣移五族待僵卒除暴姓刷恥先王三矢而興數伶而亡曾幾何時天命靡常

明宗世本代北迷姓氏父霓爲雁門部將生子迺佖烈以騎射事太祖爲人質厚寡言執事恭謹因養爲子賜姓名李嗣源令

將五百騎號橫衝都梁攻兗鄆瑄璿乞師太祖遣李存信救之
留莘縣不進使嗣源別將兵三千擊梁兵解去存信爲羅弘信
所襲敗走嗣源獨殿而還光化三年嗣昭攻梁邢洺山青山遇
葛從周兵大敗走梁兵追之嗣源從間道後至方解鞍礪鏃憑
高爲陣左右指畫追兵望之莫測急呼士卒無動吾取葛公乃
馳騎犯之出入奮擊嗣昭繼進遂不敢追及還身中四矢太祖
解衣賜藥以勞之由是李橫衝名重四方梁晉相拒于柏鄉梁
龍驤軍分赤白馬爲兩陣旗幟鎧仗皆一色莊宗舉爵以飲嗣
源曰卿望見敵陣能無懼乎雖吾亦怯也笑應曰徒有其表爾
翌日當歸吾廐莊宗大喜曰卿正當以氣吞之因大噉飲酣香
過馳騎犯其白馬拔二桿將而還以功拜代州刺史攻劉守光
將兵三萬別出飛狐定山後取武嬌儒三州莊宗已平魏州因

荀下儼相拜相州刺史昭德軍節度使久之徙鎮安國契丹攻
幽州遣與閻寶等擊走之同光元年徙鎮橫海是時梁唐相拒
河上適繼韜又叛莊宗有憂色亟召嗣源令出不意攻其郛州
以斷梁右臂乃引步騎五千涉濟襲破郛即拜天平軍節度使
蕃漢馬步軍副總管會德勝南柵破王彥章急攻郛莊宗悉軍
往救命爲前鋒擊敗梁軍追至中都擒彥章及監軍張漢傑時
梁精兵悉付段凝屯河上莊宗未知所適嗣源說曰彥章之敗
凝猶未知雖使聞而計定亦須三日救兵渡黎陽舟楫非一日
可具此去汴州不數百里前無險阻方陣而行信宿可至若汴
已破凝何足慮與崇勰謀合莊宗然之卽命以千騎先驅攻封
丘門王瓚陽門降莊宗後至見嗣源大喜手挽其衣以頭觸之
曰天下與爾共之拜中書令二年南郊賜以鐵券六月徙鎮宣

武兼落漢內外馬步軍總管冬契丹侵漁陽又敗之于涿州三年徙鎮成德十二月朔于洛陽

天成元年三月壬子奉命討魏屯御河南趙在禮登樓謝罪甲寅軍變入城與在禮合夕出止魏縣丁巳引兵而南以石敬瑭爲先鋒行過鉅鹿掠小坊馬二千匹以益軍壬申次汴州四月巳丑入洛陽甲午監國朝羣臣于興聖宮丙午始食于西宮樞前卽位甲寅大赦改元五月丙辰朔鄭珏任圖並爲中書侍郎同平章事安重誨孔循爲樞密使趙在禮義成軍節度使七月巳卯貶豆盧革韋說皆殺之八月乙酉朔閔稜于冷泉宮巳亥契丹寇邊九月巳未幸至德宮冬旱二年正月癸丑朔更名宣癸亥以馮道及太常卿崔協爲中書侍郎同平章事二月丙申擢郭從謙景州刺史旣而殺之戊戌伐荆南命山南東道節

度劉訓爲南面招討使三月壬子朔幸會節園羣臣賀宴四月
庚寅盧臺軍將龍曜等伏誅六月庚子幸白司馬坡祭突厥神
十月乙酉帝如汴州朱守殷反己丑守殷自殺辛丑降德音釋
輕繫囚是月傳箭于霍彥威十二月甲辰敗于東郊丙午追尊
四代爲皇帝妣皆皇后立廟惠州高祖諡孝恭廟號惠祖妣
劉氏諡昭曾祖教諡孝質廟號毅祖妣張氏諡順祖琰諡孝靖
廟號烈祖妣何氏諡穆考諡孝成廟號德祖妣劉氏諡懿 三
年正月丁巳契丹陷平州三月丁未朔求直言癸亥以王建立
爲右僕射同平章事范延光趙敬貽爲樞密使四月戊寅王都
反命王晏球爲北面行營招討使以討之五月契丹禿餒入于
定州辛酉封回鶻可汗王仁格爲順化可汗七月己未殺齊州
防禦使曹廷隱八月盧龍軍節度使趙德鈞執契丹首領惕隱

赫邈慶州防禦使竇廷琬反遣靜難軍節度使李敬周致討伏誅十一月甲午王建立罷四年二月癸卯晏球克定州辛酉獻俘三月丙戌殺皇姪從璨四月契丹寇雲州使撩括梅里來求禿儼殺之甲寅趙鳳兼工部尚書同中書門下平章事五月己巳羣臣賀朔乙酉追諡少帝七月壬申殺右金吾上將軍毛璋十二月辛丑殺西平令李商

長興元年正月丁卯閱馬于苑辛卯以朱弘昭爲大內留守二月乙巳石敬瑭爲御營使癸丑朝獻太微宮甲寅享太廟乙卯南郊大赦改元三月庚寅立淑妃曹氏爲皇后戊午羣臣上尊號曰聖明神武文德恭孝皇帝七月壬午訪莊宗子孫彥所八月乙未以張延朗爲三司使壬寅殺捧聖都軍使李行德大將張儉滅其族吐渾來附戊申吳海州將王傳極殺刺史陳宣來

降丙辰封子從榮秦王從厚宋王九月壬戌東川節度使董璋反命石敬瑭爲行營都招討使以討之十月丁酉始藏冰甲辰
驍衛上將軍致仕張筠進助軍衆乙巳董璋陷圓州殺節度使
李仁矩指揮使姚洪死之命安重誨致討孟知祥反十一月庚
申朔秦王從榮受冊謁于太廟丙戌契丹東丹王突欲來奔十
二月丁未二王後秘書丞鄴國公楊仁距卒廢朝一日子詹事
司直楊延紹嗣 二年二月辛丑安重誨趙鳳罷以李愚爲中
書侍郎同平章事趙延壽爲樞密使三月甲寅董璋陷遂州武
信軍節度使夏魯奇死之乙卯旱赦流罪以下囚九月丁亥放
五坊鷹隼十一月辛丑旌表棣州民邢釗門閭十二月甲寅朔
除鐵禁初稅農具党項寇方渠 三年二月巳卯靜難軍節度
使藥彥稠及党項戰于牛兒谷敗之五月丙午孟知祥攻殺董

璋遂陷綿州又陷東川六月甲寅封王建爲高麗國王達耑首
領頡哥以其族來附十月庚申幸石敬瑭第四年正月庚寅

劉昫爲中書侍郎同平章事二月戊午孟知祥使朱晃來三月
甲辰追冊晉國夫人夏氏爲皇后五月戊寅封子從珂潞王從
益許王姪從溫從璋從敏皆爲王丙戌契丹使述骨卿來七月
乙未回鶻都督李末獻白鶻命放之八月戊申大赦九月戊戌
趙廷諤罷以朱弘昭代之十月庚申廷諤光罷以馮贇代之壬
申幸士和亭得疾十一月壬辰來王從榮以兵入興聖宮旣而
伏誅乙未侍衛親軍都指揮使康義誠殺三司使孫岳戊戌帝
崩于雍和殿年六十七享國十年卽位時春秋已高遠聲色厭
遊畋減罷宮人伶官廢內藏庫四方所上物悉歸之有司復值
年穀屢豐兵革粗息生民賴以休息嘗夜焚香祝天曰臣本鄙

人豈足治天下。世亂久矣。願天早生聖人。廣壽殿災。有司重建。請加升饗。嘆曰。天以火戒我。豈宜增以侈耶。歲嘗旱已而雨雪。暴坐庭中曰。此天所以賜我。詔官中無得掃。數問宰相馮道等。民間疾苦。聞穀帛賤。民無疾疫。則欣然曰。吾何以堪之。當與公等多作好事。以報上天。吏有犯賊。輒寘之死。曰。此民之蠹。又褒廉吏孫岳等。以風示天下。其愛人恤物。益亦有意於治矣。惜乎仁而不明。屢以非辜誅殺臣下。至於父子之間。不能慮患爲防。卒之變起倉卒。陷以大惡。時大理少卿康澄上疏。常言國家有不足懼者五。深可畏者六。三辰失行。天象變見。小人訛言。山崩川竭。水旱蟲蝗。皆不足懼。若賢士藏匿。四民遷業。上下相徇。廉恥道消。毀譽亂真。直言不聞。深可畏也。當時繼岌從榮。崇輻重誨。任園之死。皆蹈其言。帝亦以此飲恨而終。

而曰天道反常貴賤易位秦晉而然不寧維是所以聖人別生分類彼以蕃興曾何足異

愍帝名從厚明宗第五子形質豐厚寡言好禮貌類明宗特鍾愛之天成二年拜檢校司徒河南尹判六軍諸衛事年雖少謙恭好禮秦王從榮恒懼不得立以爲嗣聞人道其善怏然有不足之色明宗遣人以善言諷勉從榮嘗不悅之俄加太保同平章事安重誨怒其娶孔循女爲妃出爲宣武軍節度使明年徙鎮河東封宋王歷成德天雄軍加兼中書令從榮已死明宗遣宦者孟漢瓊召王于鄴十二月癸卯朔王至始發喪成服西宮卽位樞前羣臣見於東階庚戌登光政門樓存問軍民癸丑聽政丁巳以馮道爲山陵使戶部尚書韓彥俛爲副舍人王延爲判官禮部尚書王權爲禮儀使兵部尚書李璘爲鹵簿使中丞

龍敏爲儀仗使僕射盧質爲橋道頓遞使丁卯禪

應順元年春正月壬申朔視朝于廣壽殿戊寅大赦改元用樂
乙未朱弘昭馮贊石敬瑭獻助作山陵錢閏月丙午冊皇后曹
氏爲皇太后甲寅淑妃王氏冊爲皇太妃二月庚寅潞王從珂
反命西京留守王思同爲西面行營都部署以討之靜難節度
使藥彥稠爲副帝謂朱弘昭等曰朕新卽位天下事皆出諸公
朕於事兄未嘗失節事至於此何方轉禍吾當率左右往迎吾
兄遜之以位苟不吾信死其所也弘昭等惶恐不能對康義誠
前曰西師驚潰主將怯耳今京師兵尚多臣請盡將以西扼關
而守招集亡散以爲後圖帝以爲然卽幸左藏庫親給將士人
絹二十匹錢五千軍士負物揚言到鳳翔更請一分弘實見軍
士無關志而義誠盡將以西疑其有二心謂義誠曰今西師小

劒而無一騎東者人心可知不如以見兵守京師以自固彼雖幸勝僅得張虔釗一軍耳諸鎮之兵在後其敢徑來義誠怒曰如此言弘實反矣相與爭於帝前帝不能決遂斬弘實以義誠爲鳳翔行營都招討使三月癸亥行至新安降于從珂諸鎮兵皆潰思同死之帝懼夜從百餘騎出奔至衛州東遇石敬瑭來朝新主下馬慟哭告以其故言長公主教我逆爾于路時王弘贊方爲衛州刺史宿將且多知時事往就問之敬瑭語以主上危迫吾戚屬也何以圖全弘贊因問天子避狄自古有之今將相大臣從乎曰無國資乘輿法物從乎曰無弘贊歎曰所謂大本將顛非一繩所維上爲萬乘之主將相大臣無一人從者則人心去就可知雖欲興復其可得乎卽從石郎上謁于驛舍以弘贊語白帝弓箭庫使沙守榮齊前曰主上明宗愛子公愛婿

也當此之時不能竭忠報國反問大臣國寶所在公亦助賊反邪因抽佩刀刺敬瑭親將陳暉扞之守榮闕死敬瑭因盡殺左右從兵獨留帝于驛而去弘贄奉帝居于州解日令酒家獻酒以慰無聊廢帝遣其子殿直翳持鵠與弘贄轉使酒家獻之愍帝不疑遂崩弘贄後事晉爲鳳翔行軍司馬以光祿卿致仕卒贈太傅

廢帝姓王氏鎮州平山縣人初名阿三家世微賤母魏氏寡居明宗爲騎將過平山掠其子母養以爲子年十餘歲名曰從珂及長狀貌雄偉謹信寡言明宗甚愛之又與莊宗同年其驍勇善戰亦相類自晉與梁相拒嘗立奇功同光二年授衛州刺史突騎指揮使戍于石門聞明宗南還乃引戍兵自曲陽出常山時方患兵寡賴以大振軍聲卽位拜河中節度使封潞王居諸

于中年最長安重誨慮爲後患欲陰圖之伺鎮河中閔馬黃龍莊令指揮楊彥溫閉城以拒從珂聞知乃亟奔虞鄉馳上變明宗疑其事欲親究遣殿直范溫必生致彥溫重誨固請用兵上不得已遣侍衛指揮藥彥稠留守索自過率兵以討罷從珂居清化里重誨又諷宰相馮道言其失守白謂行法帝謂姦人所中事未辨明趙鳳希意言春秋責帥之義所以勵爲臣者帝曰公等皆非本意明日果自論列問欲何處置朕當卽從重誨曰此父子之際非臣敢言惟陛下裁之明宗曰吾爲小校時衣食不足此兒撫石炭拾馬糞以相養活今貴爲天子乃不欲容之耶矧方杜門私第何與公事自是始不敢言重誨見殺起爲左衛大將軍西京留守長興三年轉鳳翔節度使愍帝立徙北京留守以洋王從瑋代之心益自疑遂據城反清泰元年三月丁

已王舉兵東庚申次長安西京留守劉遂雍叛降甲子次華州
執藥彥稠丙寅次靈寶河中安彥威陝州康思立皆降已巳次
陝州康義誠叛降遂殺宣徽使孟漢瓊怒帝出居衛州四月壬
申入京師馮道率百官迎于蔣橋王辭不見入臨于西宮始覲
羣臣道拜答之內居至德宮癸酉太后下令降帝爲鄂王命王
監國乙亥卽皇帝位丙子幸河南民財及借民房課以賞軍戊
寅弑鄂王慈州刺史宋令詢死之乙酉大赦改元戊子殺康義
誠藥彥稠五月丙午以韓昭胤范延光爲樞密使劉延朗爲副
使甲寅賜勅進遜人宗子官六月庚辰幸范延老索自通第七
月馮道罷以盧文紀爲中書侍郎同平章事丁巳立詔國夫人
劉氏爲皇后九月契丹寇邊十月戊寅李愚劉昫罷以姚顗張
延朗爲中書侍郎並同平章事十二月契丹寇雲州是歲旱

二年春二月甲戌延光罷趙延壽代之己丑追尊母魏氏爲皇太后五月辛卯韓昭胤罷劉延皓代之六月癸未羣臣獻添都馬七月劉延皓罷房暉代之是歲契丹寇邊三年正月丁未封于重美爲雍王三月丙午以馬胤孫爲中書侍郎同平章事五月契丹助石敬瑭反命張敬達爲太原四面都招討使以討之楊光遠爲副戊申先鋒指揮安審信振武戍將安重榮叛七月癸丑彰聖指揮張萬進叛俱降敬瑭九月甲辰敬達及契丹戰于太原敗績帝遣趙延壽兵二萬屯團柏谷趙延壽兵二萬屯遼州以救敬達皆逗留不進戊申自將精騎三萬出次河橋十月壬戌括馬籍民爲兵十一月戊子以盧龍節度趙德鈞爲行營都統將幽州兵萬餘帝親督之知其不收但日酣飲悲歌而已丁酉契丹立晉閏月甲子楊光遠安審琦殺張敬達以其

軍叛降于契丹甲戌契丹及晉人入潞州丁丑帝還宮辛巳自
焚年五十三晉高祖命葬燼骨于徽陵域中

冊曰厥德不恒天未祗亂秦罪未明潞惡顯踐徽陵坏土
覽者興嘆彼明有知益思先見